

東
華
續
錄

臣朱壽朋敬編

臣章圭璩恭校

二月己亥朔諭軍機大臣等前因崇厚與俄國所議交收伊犁條約章程等件經王大臣等會議諸多窒礙難行業經降旨將該革員治罪并派曾紀澤爲出使俄國欽差大臣矣俄人佔我伊犁其理甚曲崇厚奉命出使議收伊犁竟不熟權利害任其要求遽與定約殊出意料之外曾紀澤到俄國後察看如何情形先行具奏此次前往另議必須力持定見慎重辦理現已頒發國書由總理各國事務衙門遞寄并令該衙門將條約章程等件詳細酌覈分別可行不可行之款奏准後知照該少卿以便與俄人另行商辦縱或一時未能就緒不妨從容時日妥慎籌商總期不激不隨以全大局將此諭令知之○庚子樓舉普奏內閣漢侍讀祇設二缺職司票擬責任綦重向來專用科甲人員其貢生出身之漢中書典籍從無升補侍讀之案此次寶錄館請獎清單有以貢生出身之員補保侍讀頗聞衆論譁然查宗人府起居注主事均由中書升補惟貢生出身者不准中書截取同知後例得借選知州惟貢生出身者不准其他保送軍機章京等差貢生出身者亦均不准是向章與科甲區別甚嚴侍讀爲漢票簽辦事領袖之員尤關緊

要應請 飭下吏部查照向章仍專用科甲人員以重責成而杜倖進其新保貢生出身之員開到館之日甚淺差使亦次應否改獎聽候吏部另核辦理再貢生准捐內閣中書起於道光年間推廣事例戶部雖准貢生報捐吏部選補章程開以兩舉一貢爲一輪不令多占科甲之缺且如宗主知州等項皆不令升補借補侍讀係漢票簽各員表率其視宗主知州更宜限制自不待言若以例無明文則端請保恐例文未盡議及之條尙多思倖進者皆將藉口嘗試流弊不可不防如貢生出身之中書典籍有 特旨錄用非由捐納之員或添序以升途量爲區別亦似足以昭平允 上諭給事中樓譽奏內閣漢侍讀請專用科甲人員其特旨錄用貢生出身之中書典籍量予升途各摺片著該部議奏○樓譽奏浙省當軍興之後民間私買監照固有數千錢或千餘錢而買一監照者亦有不費一錢而與以監照者此等監生總不可以千數萬數計矣浙省有此恐他省亦在所不免當今軍務久平澄治捐項之時自應一律核實辦理然冊籍雖稽無從指辦惟有劃定年分自咸豐十一年起至同治十二年止所捐之監除應試及加捐之人業經補多四成外其餘概令酌補實銀幾成另給執照或以一年二年爲限如限內未經補交則議以作何扣除之例或謂真贋混淆贗者固應補捐若真者亦令其補繳似乎稍涉苛刻臣以爲雖屬真者而當其捐監之時所捐實銀計不過舊例十成之一而已今酌補幾成於舊例仍有減而無增也可

否 飭下戶部妥議章程以昭公允 上諭給事中樓譽奏各省所捐監生流弊甚多請飭劃定年分酌令補繳實銀等語著戶部議奏○辛丑諭前因御史鄧承修奏廣東廣州府知府馮端本招搖納賄庇惡營私各節當經諭令劉坤一裕寬確查具奏茲據奏稱所參該府強押陳姓生員抑勒結案趙姓致送該府銀兩該府袒護棍徒馮恕扶同局紳陳璞舞弊又串同周德芬結保積匪孔亞良該匪糾殺孔廣仁家七命亦不追問惟追繳孔姓花紅銀兩及稟請終養謀爲他日坐補原缺地步各節除查無實據外所有該府承審佛山清河一案任令造報遲延且未傳訊原告於馮恕一犯遲久始據具稟仍不照例擬辦該府署雖未設有同通官屬而同通委署州縣至官屬守候傳見該府亦聽其所爲殊屬不合局紳前任江西安福縣知縣陳璞於馮恕誣指梁亞爵爲盜未能確切訪查輒卽呈請查辦殊屬徇徇馮端本陳璞均著交部分別議處○癸卯諭前據御史周開銘奏廟爾喀貢使來京崇文門員役詐索理藩院辦理失體蒙古王公年班來京理藩院崇文門員役任意勒索各節當派廣福潘祖蔭查明具奏茲據奏稱崇文門於廟爾喀貢使到京並無裁贓詐索傳見喝阻及私造木戳等情惟貢使所帶土物例應免稅海巡倭什渾等輒以漏稅稟報實屬妄摺委屬博啟祥曹不知詳查輒行批罰看押辦理失當理藩院承辦廟爾喀進貢事宜尙無不合亦無勒索規禮蒙古王公年班來京理藩院崇文門均無縱容員役勒索各情事



等語崇文門海巡領催倭什渾外委李逢源內管領吉瑞守備龐光裕外委龔維政均著照所擬杖一百
李逢源等均革去職銜免其發落委員吏部郎中博啟正藍旗護軍參領祥普均著交該衙門議處崇文
門監督靈桂照祥失於覺察均著交該衙門察議嗣後外藩王公及使臣到京該衙門於一切事宜務當
加意妥辦用副朝廷撫綏藩服至意餘著照所議辦理○甲辰諭河南河北道吳大澂著賞給三品卿銜
前赴吉林隨同銘安幫辦一切事宜○以前甘肅提督曹克忠交直隸總督李鴻章差委○乙巳諭都察
院奏降調順天府府丞王家璧遺抱赴該衙門呈訴據呈奏聞一摺王家璧前被貢生魏晉康等控告經
銘安查明該前學政兩次按臨需用煩瑣並用書院經費無庸另籌仍撥用紳捐生恩銀兩作為考費以
致士心不洽各節當因該前學政諸多支飾交部議處乃王家璧輒以該將軍所奏與前次兩咨不符等
語曉曉激辯若不再行確查不足以折服其心著潘斯派詳細查明據實具奏○丙午祭 歷代帝王廟
遣載勛行禮○祭 先農壇遣降魁行禮○賞給原任廣東陸路提督劉松山之母通政使劉錦棠之祖
母劉陳氏匾額○丁未諭本年輪應查閱湖北湖南雲南貴州四省營伍之期湖北即派李瀚章湖南即
派李明墀雲南即派劉長佑貴州即派岑毓英逐一查閱認真簡校如有訓練不精軍實不齊者即將廢
弛之將弁據實參奏毋得視為具文○戊申朔 日於東郊○庚戌諭軍機大臣等前因有人奏四川修

築都江堰堤工奏報不實等情當諭令恆訓按照所奏各節確查具奏茲據該將軍先後奏稱勘明都江堰外江淤沙堆聚地勢高於內江丈餘丁寶楨復將內江挖深一丈七八尺水勢全注內江連年堰工冲塌實由分水不勻所致灌縣等處並無涸出農田八萬餘畝之多等語丁寶楨雖次所奏修築堤工具有成效朝廷以該署督辦理地方事宜尚能破除情面認真整頓故責成始終經理信任不爲不專丁寶楨若果事事措置合宜何至人言嘖嘖此次恆訓所奏竟與該署督奏報情形迥不相同著丁寶楨按照恆訓覆奏各節據實明白回奏如敢意存掩飾貽誤地方恐該署督不能當此重咎也恆訓摺片四件著鈔給閱看將此山驛四百里諭令知之○癸丑諭岑毓英奏遴員接辦梵淨山餘匪一摺務當嚴飭何秀林等認真搜剿即將朝陽寺等處掃蕩毋任一匪漏網以免死灰復燃一切善後事宜尤宜詳細妥籌實力辦理務使宵小潛移默化弭患無形○諭前據岑毓英奏通籌該省每年贖買銀兩儘先刪撥的餽各節當經部議各省關於協黔月餽內減成撥解併於積欠協餽內提銀六十萬兩先行趕解○甲寅命晉祺赴秦東陵行禮○丙辰命桂盟赴孝陵行禮○戊午丁寶楨奏川省鹽務積滯引張之多積欠羨截之鉅爲他省所未有臣詳細體察在同治七八年以前猶可藉口於黔邊岸久未疏通追同治九十年以後邊岸既漸有轉機而滯楚引張定爲五邊一計銷行亦暢何至引積羨懸轉甚於前十倍且盤金亦遂

年遞減推求其故始知前任四川鹽茶道傅慶貽在任時創爲撥釐作羨之法自此羨釐兩項頗多含混以致收數愈形短絀隨飭清查局司道督飭委員檢查同治九十年以後鹽署檔案切實核辦茲據詳稱傅慶貽任內創議撥釐作羨係於商人應完釐金項下准其每引一張撥出釐銀二兩抵作應完羨截二兩收庫計同治十一年三月初一日傅慶貽定章撥收起至光緒三年冬間奏改官運停撥止前後五載有餘僅收過撥釐作羨九七平九九色鹽釐銀一十四萬七千三百七十一兩零折實淨收庫平色銀一十三萬八千八百四十五兩零復按引分算其各任欠收羨截銀數自同治十一年三月初一日起截至光緒二年年底止除撥釐填羨外各商實共欠羨截銀三十九萬二千五百一十九兩九錢零其光緒三年十一月以前短少銀三萬三千六十六兩有零尙未併在內綜計自咸豐九年起到光緒四年止前後共積欠鹽羨截銀一百四十萬一千一百八十五兩六錢零該司道查近年奏銷冊籍比較各年欠數同治十一年以前未經撥釐作羨每年積欠羨截不過四五萬兩至同治十二年以後業經撥釐作羨每年積欠羨截轉多至八九萬兩及光緒三四兩年奏改官運停止撥羨每年鹽道衙門計引積欠又不過三萬數千餘兩此中得失較然可觀是傅慶貽創爲此法名爲撥釐作羨實則挪釐減羨耳且稱撥釐之後解羨務令找清一似於釐無損而於羨且有益者一時朦混詳准豈知商人趨利嚙壞綱網不但應找羨

銀不肯找清且比上年解繳之數多寡懸絕卽如富順縣因商人不交新徵羨截續稟請將本年撥收之
盤抵解本年新徵之羨一案經傳慶貽廣此中飭責其抓抄抵水一面詳明嚴催撥盤之款原爲彌補積
欠不准挪抵新徵今若由縣挪抵每屆新徵商人則專恃此項撥盤作抵新徵之羨必難催收舊欠吏何
從籌補等語可見撥盤作羨傳慶貽早已洞悉如肯卽時提實吏正截然停止其時虧欠無多尙可設法
彌補乃因循不改年後一年坐使國家數十萬之正供化爲烏有實爲可惜當日如果爲恤商起見但
將一切陋規浮費稍加減減已足相抵何致挪減盤羨正款如謂減羨撥盤實出於萬不得已則與其減
羨二兩不如減盤二兩蓋每引減盤二兩不過二兩而止其未減之數猶可照常徵收也此盤撥收他引
之羨又以此盤抵放所撥止一引之盤遂使兩引之羨並歸無著傳慶貽續詳時所亦慮及者也至於已
減之羨既經抽盤庫補而未減之羨亦並藉盤抵塞撥一引之盤遂使一引之羨全歸無著此則傳慶貽
所未慮及者也夫羨截固屬正供而盤銀亦關軍餉同一庫款原無彼此之分何必多此周折遂至得一
亡十數年之內商欠羨截積至四十餘萬兩減收之盤尙不在內鹽務積弊至於無處不壞向非奏改官
運則此撥盤作羨之弊虧欠正款尙不知伊於胡底今計自開辦官運以來邊計稅羨均由官運總局核
實成本照數徵收符先課後鹽之意絲毫不能拖欠而邊引應納盤金又均涓滴歸公無復挪此填彼之

幣一年之中一出一入挽回正款不下十餘萬行之十年其數不下百十餘萬川省庫款盈絀卽此一端已可概見惟傳慶貽當日既知撥燈之舉有礙正供並不據實更正停止以致虧欠釐羨各款如是之多實難置身事外現查咸豐元年起至同治十一年未經撥燈以前應收羨截欠款容查明官欠商欠引欠分別核追外至同治十一年三月初一日以後劃撥填羨之釐一十三萬有零至今無從追款積欠羨截三十九萬有零至今亦無從徵收據該司道等造冊會詳請核前來臣查傳慶貽創爲撥燈填羨之舉名爲撥燈實係挪釐名爲填羨實係減羨事後既明知其誤又不急爲更正以致頻年羨釐兩項短收愈甚其貽誤要需傳慶貽亦無可置辨但此時若責令原辦商人每引補繳羨截二兩各州縣商人必以遵照鹽道從前定章辦理並非私自撥填爲詞藉口不補且事隔多年商人歇業死亡者亦復不少追呼實覺無益查上年官運一辦過岸之挪抵早停現在清查而計岸之挪抵亦從此永禁以後別無可作之弊懇恩准將各前道撥燈作羨之一十二萬八千八百四十餘兩照數開除毋庸飭令再補用恤商力具歷年積欠羨截銀兩仍由臣督飭新任鹽道另行設法催繳以重公項至傳慶貽辦事錯謬敗壞川省鹽法既據該司道等查明具詳何敢因其已經離省代爲隱飾惟核其情節究與扶同商人作弊者實有區別可否懇恩從寬予以革職免議之處伏候 聖裁 上諭前據丁寶楨奏參傳慶貽前在四川鹽茶道

任內辦事錯謬敗壞鹽務請旨革職等情當交吏部議奏茲據奏稱傳慶貽職司鹽政創為撥釐作效以致收數短絀實屬有辜職守應照滿職例革職等語安徽布政使前四川鹽茶道傳慶貽著照部議卽行革職○己未調盧士杰爲安徽布政使實授陳士杰爲福建布政使以鹿傳霖爲福建按察使○大學士沈桂芬戶部尙書景廉與德使巴蘭德續訂修訂六款善後章程九款成其文曰 大清國 大皇帝大德意志大皇帝兼布國大君主今欲將咸豐十一年七月二十八日所定通商和約章程益臻恪守因案查前定條約第四十一款內載日後德國若於現議章程條款內有欲行變通之處應俟自章程互換之日起至滿十年爲止方可再行籌議等語茲彼此循照前約量加修增是以 大清國 大皇帝特派總理各國事務協辦大學士兵部尙書沈總理各國事務戶部尙書景大德意志大君主特派欽差駐紮中華便宜行事大臣巴各將所奉全權大臣便宜行事之 上諭互相校閱俱屬妥當現將會議所增各款開列於後 第一款 一中國除在湖北宜昌安徽蕪湖浙江温州廣東北海前已添開通商口岸並沿江安徽之大通安慶江西之湖口湖廣之武昌陸溪口沙市等處前已作爲上下客貨之處外現又允江蘇吳淞口一處德國船隻暫准停泊上下客商貨物一切由江海關道等自行妥議章程辦理 一德國允中國如有與他國之益彼此立有如何施行專章德國既欲援他國之益使其人民同霽亦允於所

議專章一體遵守其咸豐十一年七月二十八日所立條約內第四十款特爲言明仍遵其舊其後中國所有施於他國及他國人民各益德國人民如欲照第四十款之意一體均霑則亦應於彼此訂明專章一律遵守 第二款 一中國允德國船隻已在中國完納船鈔者如往中國通商各口或往各國口岸在四箇月限內均不重征再德國夾板在中國口岸停泊十四日以外者則自第十五日起卽於應交正數船鈔減半 一德國允凡德國各處准各國領事官駐紮者中國亦可派員駐紮按照待各國官員最優之禮相待 第三款 一中國允凡中國通商各口由該監督等酌量情形如係衆洋商情願無礙地方者該監督等妥議章程自行設立關棧 一德國允德國船隻進中國通商各口其貨物清單須將貨物件數開明內有舛錯處准於十二時限內改正逾期不計倘有漏報捏報之事除將該貨物充公外仍應罰該船主惟所罰之數不得過五百兩 第四款 一中國允凡德國商人裝運中國土煤出通商各口者應完出口正稅銀兩定爲每噸三錢並允如有某口前定不及三錢者將來仍照不及三錢之數征收 一德國允凡無照冒充各項船隻引水者卽應議罰惟所罰之數每次不得過一百兩並允妥速會定約束水手章程 第五款 一中國允凡德國船隻或在通商各口內口外受損應行修理者准於該口海關查明日期扣算該船應完之鈔項 一德國允中國商民自備各項船隻不准張掛德國旗號德國

船隻亦不准張掛中國旗號 第六款 一中國允凡德國損壞船隻有在中國通商各口內拆賣該船各料者准其不另征進口稅銀惟起岸時仍須照各貨一律赴關請領起貨准單為憑 一德國允德國人等如有未領領事所發中國地方官蓋印執照赴中國內地游歷者准該地方官將其人解交附近領事官管束外仍應議罰惟所罰之數不得過三百兩 第七款 一中國允凡德商船廠應用雜物准其免稅由總稅務司將應行免稅進口各物名目彙發清單曉諭 一德國允凡德國人等運洋貨入內地及入內地游歷所領單照自發給之日起均以十三箇月為限均照中國月日計算 第八款 一中外官員審辦交涉案件以及商人運洋貨入內地及洋商入內地買土貨如何科征又中外官員如何往來一切事宜此三節應歸另議今兩國暫先訂明彼此均允妥商 第九款 一咸豐十一年七月二十八日兩國前定條約除現修條款未改訂者均經特為言明仍舊恪遵外其有變通得章者均照現修各款辦理 第十款 一現修增各款恭候兩國 御筆批准仍自畫押之日起限一年內在 大清京師互換並經言明所有各款自互換之日起即行遵辦現兩國 欽差大臣將漢文條約章程各四分校對無訛先為親筆畫押蓋用關防以昭信守 善後章程九款 現將續修條約再行酌定章程俾得申明以昭周備所有後開各章程兩國官民應與條約一同遵守為此兩國大臣蓋印畫押以昭信實 第一款 一江

蘇吳淞口一處議准通融辦法如有德國船隻欲在該處載卸客商貨物或於他處運來上海或於上海運往他處均聽其便由江海關道等自行設法釐定偷漏稅課及防各項弊端章程中外商民一體遵守仍不准德國商民在該處起造碼頭設立行棧 第二款 一中國通商口岸如可設立關棧先由上海試辦卽由該監督會同總稅務司酌量情形妥議章程由該監督等自行設立 第三款 一凡德國船隻有應領海關准單方准起下之貨物而清單未開明者無論船主有無置押收據在先均爲漏報 第四款 一德國船隻或在中國各口內外受損應行修理者其修理日期扣算在免鈔期內准中國官前往查明辦理如查係飾詞偷漏者卽照該船圖免噸鈔之數加倍議罰 第五款 一中國人等自備各項船隻不准張掛德國旗號如有可疑之跡中國該管官知照德國領事官查明實係不能掛德國旗號之船當將該船及船上華商之貨卽行解交中國地方官辦理倘有德國人等知情通同舞弊者卽將船內所有該德國人貨物全行入官仍將其人按例懲辦德國船隻如張掛中國旗號卽將其事由中國地方官查明如實係不應張掛中國旗號之船當將其船並船上德商貨物卽行解交德國領事官辦理並將舞弊之人由領事官照例懲辦倘查明有德國貨主人等知情通同舞弊者卽將其人船上貨物交中國全行入官其船上華人貨物可由中國地方官卽行入官 第六款 一凡德國損壞船隻有在中國

通商各口內拆賣該船各料者如有將船內裝運各項貨物影射偷漏者除將漏報貨物入官外仍照應完進口稅銀加倍懲罰 第七款 一德國人等運洋貨入內地或入內地游歷所領單照均係自發給

之日起以十三箇月為限

均照中國月日計算

逾限作為廢紙仍呈本關繳銷

如游歷道路太遠不能一年為限者發照時即將此節照內由地方官會

商領事倘未繳銷在補繳之前不准再行請領倘或遺失單照無論限內限外即向就近中國官員據實報明由該官員設法查辦以杜假冒如查係捏報運貨者貨物入官游歷者解交附近領事官懲辦 第

八款 一德國船廠應用雜物實係修理船隻者方准免稅進通商口岸一面由關派員進廠將其如何

使用各物之處眼同閱看如係製造新船其進出口稅則內所載之貨照稅則辦理其未載明之物均照

值百抽五例徵稅令該商赴關補納至開船廠者必先赴關領照

此照並無關費

並具保結內所註明各節悉由

該關妥議酌辦 第九款 一所有續修條約內各罰款仍照咸豐十一年七月二十八日所定條約第

二十九款辦理

附件一

大清欽命總理各國事務和碩恭親王軍機大臣大學士管理吏部事務寶

軍機大臣協辦大學士兵部尚書沈軍機大臣署吏部尚書李軍機大臣戶部尚書景戶部尚書董吏部

左侍郎麗軍機大臣戶部左侍郎王署刑部左侍郎內閣學士兼禮部侍郎銜崇二品頂戴宗人府府丞

夏為照會事查此次修約第二款內稱德國夾板在中國口岸停泊十四日以外者則自第十五日起即

於應交正數船鈔減半等語此節現經兩國大臣訂明先行試辦如有窒礙難行之處可由兩國從新另議特此聲明須至照會者 附件二 大德欽差入華便宜行事大臣巴為照覆事接來文內開此次修

約第二款內稱德國夾板在中國口岸停泊十四日以外者則自第五日起即於應交正數船鈔減半

等語此節現經二國大臣訂明先行試辦如有窒礙難行之處可由兩國從新另議等語據此之餘本大

臣均無異議嗣後彼此即應遵照施行特此備文聲明可也須至照會者 附件三 大清國總理各國

事務衙門大臣沈景麟王崇大德國欽差入華便宜行事大臣巴為公立文憑事案照兩國特派 欽差

大臣 光緒六年二月二十一日 續修條約 光緒六年二月二十一日 續修條約末後第十款內所載自押押之日起限一年內互換一條

現議將期限改在 光緒十一年十月初十日 一千八百八十一年十二月初一日 互換除此款其餘以上議定各款概不更改現經兩國

欽差大臣將 德文約章 各二分校對無訛先為親筆畫押蓋用 關防 以昭信守須至文憑者○庚申諭

御史鄧慶麟奏京師捕務廢弛劫案迭出如上年八月間東四牌樓北花戶王泰被眾謀殺及朝陽門外

住戶魯羅榮曹家被賊強搶傷斃事主等案迄今數月並未獲犯一名此外各案逸犯不勝枚舉等語若

如所奏殊屬不成事體著步軍統領衙門順天府五城御史一體逐案嚴拿務獲究辦○大學士載齡因

病乞休不允予假兩月○諭裕寬奏請飭藩司迅速赴任等語新授廣東布政使姚觀元前已諭令毋庸

京陛見卽著李瀚章飭令該員迅赴新任以重職守○諭軍機大臣等有人奏內務府銀庫庫掌李元裕之子李惠齡夥同候選道內務府郎中廣陞在城內開設海興盛東海長等字號銀錢行帳局數處重利盤剝請飭查辦等語如果屬實殊干例禁著步軍統領衙門查明據實具奏將此諭令知之○壬戌原任杭州將軍廣科卒予祭葬靈柩到京時派員勒載滴前往奠輟○予湖南長沙縣節婦車李氏旌表○癸亥上詣奉先殿壽皇殿行禮○裕祿奏安徽壽州紳民捐資重修瓦埠鎮南鐵佛岡地方先賢宓子不齊墓請飭部立案允之○甲子命工部左侍郎孫貽經仍在南書房行走○諭給事中郭從矩奏蘇杭善局救災卹鄰請飭纂入志書以彰風化一摺光緒三四年間山西河南等省旱災甚廣經蘇州上海揚州杭州各紳士設局接濟兩年之間計交直豫秦晉被災之區將及百萬該紳等雖不求獎敘而急公樂善之心固未可聽其湮沒著江蘇浙江各督撫將各該局首事姓名事績纂入本籍志書以資觀感○諭軍機大臣等祥亨等奏直屬之張嶺多三關各旗官荒馬廠開墾已有成效若能認真查明欠交押荒銀兩盡令按畝補交比戶計田派夫訓練佃戶既有著落練勇卽屬有裨尤爲兩得之計著李鴻章遴選明幹道府前往切實查明呈報應如何籌辦之處酌核具奏將此諭令知之○乙丑李璠奏知縣爲親民之官欲得其人必先讀書明理故內選班次莫優於散館知縣而歸班知縣何竟至杳無選期外補

班次莫優於卽用知縣而卽用本班何復令壓班遲滯臣查吏部銓選則例內開雙月知縣用進士五人如無人將進士教習抵選新進士兩人如無人將進士抵選舉人五人如無人將舉人出身之俸滿教職抵選俸滿教職兩人如無人將舉人抵選 恩詔廢生一人如無人將進士抵選殉難廢生一人如無人將進士抵選捐納四人如無人將舉人抵選推升三人二十三人爲一班等語核計雙月抵選之數進士之抵班四已較少於舉人之抵班六矣又查定例單月知縣用賑滿應補四人如無人將舉人出身之俸滿教職抵選開復應補二人如無人將應補抵選親老改近終養服滿病痊引 見不必坐補原缺或仍以原官用者二人如無人將應補抵選捐納四人如無人將舉人抵選又無人將應補抵選進士四人如無人將應補抵選新進士二人如無人將舉人抵選又無人將應補抵選舉人四人如無人將應補抵選俸滿教職二人如無人將舉人抵選又無人將應補抵選鹽場期滿保題一人如無人將應補抵補京升俸滿副指揮一人如無人將應補抵選其應用擬抵之進士新進士舉人班次如再無人俱以舉人出身之俸滿教職抵選等語核計單月抵班其數二十有六而以舉人抵者十二以應補抵者十四其間遇舉人應抵無人復以應補抵者其數八其間遇應補抵無人俱以舉人出身之俸滿教職抵選者其數十是應補一項均各有抵班又各有彼此無人互抵之班而進士一項單月則全無抵班也又查吏部銓選章

程內知縣升調遺缺故休選缺輪用進士卽用班前候補班前時將銀捐候補班前儘先並進士卽用班前儘先合爲一班統按接到過班部文日期及到省先後請補一人其減成報捐之員有所區別也臣思鄉會試爲掄才大典而讀書通籍者半多寒賤之士其以歸班知縣銓選以卽用知縣分發者類皆中年以後之人正宜使之及時自効俾得早展百里之才從前選輪祇數十人一週到班甚易近因各項插班甚多一輪須一二百人一週到班甚難而捐納人員一經上兌便可得官甚有未及歲者先行納資儼爲服官地步勞績人員一二年投効一兩次保獎卽成正印一官而歸班知縣卽用知縣計其得官年歲較之庶吉士部屬等官固已有傷老大又復選補無期欲歸銀捐則苦於寒素僅歸卽用則苦於歷班徒使晚成之器幾成廢棄之材於設科取士之意殊未洽也臣愚以爲內選定例進士正班未可議增而抵班似可酌加外補定章進士卽用正班既係分班則銀捐進士卽用班前與銀捐候補班前似可毋庸合爲一班如於雙月進士四抵班加爲六抵班則雙月多二抵班矣單月知縣應補班係曾任實缺是雙月無班僅單月有班自應多予以抵班之數以示從優似亦不得逾二十六抵班之半其十三抵班如以八抵班給與進士出身以五抵班給與舉人出身其應用應補抵之班次無人俱改以進士知縣抵選則單月亦有進士抵班矣至外補班次如輪用進士卽用班前候補班前時將銀捐候補班前儘先進士卽用班

前儘先各按各班分別請補一人銀捐卽用如無人用常捐卽用班前如無人用勞績卽用班前如無人用卽用正班其輪用候補班前時亦各按各班辦理則卽用與候補兩不侵佔至勞績保獎原以激勵人材吏部保獎章程於京員限制尤嚴著有異常勞績方准保獎無論題選咨留遇缺卽補且每案不得過三人著有尋常勞績祇准保獎遇缺卽補其保獎無論題選遇缺卽補無論咨留遇缺卽補者亦必異常勞績方准列保是明明以無論題選咨留爲一班以無論題選無論咨留爲一班以遇缺卽補爲一班於激勵之中仍示區別以杜倖進查保獎無論題選咨留遇缺卽補人員既准其歷班先補其保獎無論題選遇缺卽補無論咨留遇缺卽補人員與係保遇缺卽補人員勞績既有等差敘補亦應區別惟吏部補缺章程於勞績到班留補之選缺仍以無論題選遇缺卽補無論咨留遇缺卽補人員與係保遇缺卽補人員作爲一班統較奉旨日期先後敘補是勞績雖有等差而補缺不分班次也殊覺未爲允協擬請飭下吏部再行釐定凡保獎無論題選遇缺卽補無論咨留遇缺卽補人員除題咨缺出仍照舊章辦理外遇有勞績到班留補之選缺應比照遇缺無人方用儘先之例先將無論題選遇缺卽補無論咨留遇缺卽補人員儘數補用如無人方以遇缺卽補人員補用庶異常勞績與尋常勞績有所區別而敘補亦昭平允

上諭御史李璠奏進士知縣班次壅滯請將選補章程最爲變通及京員勞績到班留補之

興缺變通敘補各摺片著吏部議奏○諭御史李璠奏京員等支領俸米請變通辦理等語著戶部議奏
○予湖南澧州節婦潘張氏旌表○內寅會國荃奏查太原府屬之榆次縣自康熙年間初定例 貢西
瓜六百四十箇向由該縣之東郝西郝中郝三村採辦嘉慶三年奉 旨減免一半每歲正 貢二百箇
隨 貢一百箇歷經遵辦在案伏查 貢瓜三百所值無幾而吏胥苛派道路盤費民間苦累多逾千金
至 京都或霉壞生釘不可復食值茲大祲之後錢糧正賦尙蒙 聖恩蠲免似此瓜果微 貢無損於
上有益於下尤爲仁政所必及懇 恩俯准將榆次縣三郝村瓜 貢三百箇永遠蠲免出自 鴻恩
得 旨如所請行○丁卯予河南歷年承辦糧臺轉運出力候補道蔣沅等優敘○是月荷蘭國使臣費
果孫因病回國副使來因代理

三月戊辰朔閏敬銘奏病勢增劇未能入覲得 旨著安心調理一俟病體稍愈卽行來京陛見○己巳
兩○諭軍機大臣等郭松林舊部著李瀚章飭令卽行拔隊來直奉天原調古北口天津練軍俟宋慶一
軍到奉後能否撤回著岐元體察情形奏明辦理○庚午涂宗瀛奏 臣前因豫省交代急應及時釐剔以
清積欠而杜新虧飭據前升司裕寬認真辦理一切情形業經 臣於光緒四年九月三十日具奏在案旋
據署藩司德馨詳請咨取山東章程核辦當經備文咨取准山東撫 臣周恆祺鈔錄原案咨覆到豫 臣參

酌豫省情形悉心籌議據布政司長擬稱該司前在山東署藩司任內稔知東省交代之結欠款之清皆得力於嚴辦二參及半年彙奏卽此次咨取章程亦係該司署任時續議詳定茲復悉心籌防仿照辦理擬自光緒六年正月初一日以前統作舊案交代勒限半年交成該管道府州督同核算一律清結以後作為新案交代照例查辦二參以嚴考核仍責令該管道府州就近督算如有遲逾卽由道府州查取職名據實揭參倘或一人而有兩任交代及錢糧倉穀較多照例加展並自光緒六年正月爲始各州縣交代每屆半年開具清冊彙案詳請奏報一次作為定章永遠遵行交代算結後如有虧欠照例嚴追無論新案舊案不准再有自行清理名目一經出結並令將交抵款摺隨時申送以便稽查其光緒六年以前揭報有虧各員除家產盡絕及無子孫出仕捐廉歸補外其餘未完之案無論銀數多寡亦無論現任候補參革病故人員均以本年正月初一日起勒限半年完解清款倘展限不完及完不足數照例詳請奏參勒追等情具詳前來臣查豫省新舊交代自光緒四年奏明勒限清算以後由司陸續督率算結除已造冊報部外其餘未結之案尙有一百七十餘起之多且已結各案交款仍多未清皆因病習相沿積重難返所致茲經臣督飭藩司仿照山東辦法參酌豫省情形悉心籌議明定章程分別請案勒限半年清結新案嚴辦二參並擬半年彙奏考核加嚴虧欠者立予嚴追遲延者照例參辦如此認真清理庶各州

縣知所倣吳交代可期速結庫款不致久懸報聞○以前甘肅安甯道奎斌發往直隸交李鴻章差委○
辛未 上詣 大高殿拈香○岑毓英奏查黔省綠營無閩之年例撥兵餉銀七十六萬一千四百六十
九兩六錢一分三釐有閩之年例撥兵餉銀八十一萬一百三十六兩二錢七釐向係上年估撥次年六
七月抽數解清歷經遵辦在案黔省自咸豐四年軍興以後雖仍准部估撥各省從未報解前之積欠固
已難催而上年停捐以來黔省入款無幾全望外省接濟 臣到任後遵 旨整頓營制嗣改勇爲兵辦理
完竣均經奏報各在案現在通省守兵均補足額馬步戰兵卽由防勇改編齊備作爲練軍防守要隘兵
數營名悉如舊制此外添派營務統帶營哨各官俱仰遵 聖訓破除積弊認真訓練所需兵餉 臣飭藩
司搜羅捐項尾數自光緒五年十月起按月全數支放以昭信守茲已操防數月壁壘一新惟庫無存餘
春季之餉未有著落全局籌畫在在堪虞查已卯年奉部估撥兵餉內如江西一省撥戊寅年應徵地丁
銀三十萬兩四川鹽釐並寶存地丁按糧津貼鹽運鹽稅等款項下共撥銀二十八萬兩廣西梧州兩廠
盈餘銀五萬兩兩淮鹽釐銀五萬兩浙江已卯年應徵地丁銀十三萬一百三十六兩二錢七釐共含有
閩年八十一萬兩零之數迄今無一報解誠恐仍前有名無實關係匪輕在部 臣按年估撥原屬遵循例
章無如各省今昔懸殊亦或力有未逮似應分別盈虛辦理以免推諉貽誤且黔省規復營制伊始尤須

竭力維持據藩司會同善後局員詳請具奏另撥前來。臣籌思再四本省地瘠民貧實無生財之術懇
恩俯念苗疆初定營伍緊要 飭下部臣准自己明年起將常年兵餉於各省關餉力相寬之處分攤提
撥定限本年三月迅速解黔以濟急需嗣後按年照例認真撥解俾得固軍心而弭邊患下戶部議奏○
丁寶楨奏從前迭准部咨飭禁川鹽濟楚規復准岸。臣自到任後復迭次接准部催照辦在案其時以川
省應行之兩黔兩省邊岸軍興後荒廢多年川鹽賴以濟楚始有出路而川鄂兩省抽收鹽釐實爲餉源
鉅款若不求川鹽出銷之路並籌備鄂省應支之餉則議停止不惟商情不順且坐失自然之利於國計
民生關係實非淺鮮然後准終屬籌制萬不能因循輟惟。復准地步奈川省鹽綱墜壞已數十年若
仍積習相沿終無成效再四思維惟有仿照雍正年間川省官運商銷成法於光緒三年酌議章程具奏
咨部議覆照辦荷蒙 俞允於瀘州設立總局委道員唐炯綜理其事因帑本短絀僅得先辦黔邊一岸
仰賴 聖主福庇開辦後銷鹽頗暢引全完並帶銷積引徵收稅羨截釐各款著有成效四年續經奏
准接辦滇邊迄今兩次奏銷行引俱能足額各處口岸亦漸次開通各廠鹽斤均漸有銷路此時若議停
楚復准在川省已可照辦惟念川鄂轉商相依鄂省自川鹽入楚每年抽釐百數十萬兩實爲餉需大宗
川鹽一停此項即歸烏有而應行協撥各款爲數甚多究從何出彼此兼顧不致貽誤大局擬請 飭下

部及兩江督臣議定每年撥解鄂省有蓄之款一百二十萬兩俾其支發稍舒不致短絀然後川淮引鹽始得各歸各岸復題請制以全三省之利如以議撥鄂餉不能如數抑或所撥之款不能盡實則川鹽自未便驟停致礙鄂省餉需查上年前兩江督臣沈葆楨以濟楚如不能遽停擬由川省酌定行銷引數以示限制而商之臣臣以現在開辦漢陽兩省即是歸還淮岸地步所商酌定行銷行數以示限制係屬釜底抽薪之法應可照行今若部臣及兩江督臣因籌撥鄂餉一時不能應手則鄂餉無出川鹽自未便即停似可查照沈葆楨所議酌定引數行銷之法每年川鹽濟楚准令行引八九千道以示定限不得逾額俟鄂餉議有實款後再行全數復還庶三省均可兼顧而鄂餉得有實濟復淮之說自不致徒託空言下戶部議奏○癸酉諭前據御史鄧慶麟奏內務府銀庫庫掌李元裕之子李惠齡夥同候選道內務府郎中廣陞開設海興盛東海長帳局重利盤剝等情當經諭令步軍統領衙門查明具奏茲據奏稱查明城內旂壇寺地方北極寺廟內有海興盛帳局一處該局民人王樹藻供明領得廣姓本錢三千吊而廣陞親供該局係山東民人孫復信向伊父借錢開設實非該員成本並無與李惠齡夥開之事亦未得過候選道與孫復信所供略同惟與王樹藻結稱情節不符請旨訊辦並稱查無東海長帳局各等語此案著交刑部審訊郎中廣陞即著聽候傳質○甲戌諭祥亨等奏軍臺廢員兩次由配脫逃請旨飭緝究

辦一摺廢員沈仕元前經由配脫逃自行投首現復潛逃雖保不遁回原籍或潛行來京而應嚴密查拿
著兩廣總督廣東巡撫並步軍統領衙門順天府五城御史一體嚴拿務獲究辦○諭前因御史鄧麟慶
奏內務府廣儲司銀庫庫掌李二即李元裕任聽伊子李七即李惠齡代辦差務有勒索規費冒領公款
抽減發項情弊造辦處近年核銷款項至數十萬兩等情當諭令總管內務府大臣查明具奏茲據恩承
等奏轉查明廣儲司銀庫並無庫掌名目祇有庫帳案上差使係李元裕本身充當李惠齡在庫帳案上
効力並無擅作威福干預放款冒領扣減情事其餘所參各節均無其事惟李元裕不能管束伊子致招
物議現將李元裕李惠齡革去差使並將李惠齡披甲錢糧一併斥革等語除廣陞夥用帳局一節昨經
降旨交刑部審訊外李元裕等既經斥革著無庸議另片奏查明造辦處近年核銷款項僅止十萬兩上
下較往年有減無增等語現在庫款支絀自應遇事撙節仍著該總管大臣等認真整頓核實辦理如有
浮冒等弊卽行從嚴參辦○乙亥諭軍機大臣等左宗棠奏遵籌布置情形一摺左宗棠定於三月內出
紮哈密著於到防後將三路官軍及後路填紮各營相度機宜與金順等妥商調度並隨時偵探伊犁情
形慎密籌辦以免疏虞○諭上年順天直隸秋禾被水各州縣迭經降旨賞給漕糧撫恤災黎現聞窪區
仍多積水麥未播種即使迅速疏消祇能播種秋稼收穫尙遠饑民待哺嗷嗷殊堪矜念加恩著賞給江

蘇浙江漕米共十萬石卽著李鴻章就近截撥督飭屬員體察災區輕重及時分撥確查戶口核實散放並酌量以工代賑務使實惠及民不准絲毫弊混用副朝廷軫念民艱至意至隨漕輕齋等項及剝價銀兩經剝耗食米石並著飭令各該糧道提扣解交直隸賑局津貼運費該部知道○丁丑諭軍機大臣等給事中張觀燾奏山西定襄縣向有古渠約可灌田數萬畝迄今渠身久廢農民失利請飭查勘辦理等語著曾國荃委員會同地方官詳細履勘酌量籌辦原片著鈔給閱看將此諭令知之○張觀燾奏臣聞各省州縣補缺吏部書吏按缺之優劣指要銀兩名曰部費軍需糧臺河工柴料外防勇糧皆有呈報細冊若不將部費託人向戶兵工三部關說則雖冊子上呈仍然指其小疵藉端挑駁應發之款萬難准其支領卽應銷算者亦不能無事至捐輸冊各省皆有分局各省委員勾串奸商以少報多空白官照紛紛倒填年月戶部司員高下其手皆有沾潤前此甘肅雲貴等省報銷花用部費幾至數十萬金司員分肥奸商簸弄書吏均分司員中有把持官事而貪得無厭性情暴戾者又往往藉堂官之威勢欺壓書吏之無知則併吞之費更多而書吏飲恨轉易開其攻訐因司員未能潔己奉公故書吏益形橫肆使外省司庫之藏爲此等不肖官吏所中飽甚無謂也方今之事泄沓已極雖迭奉諭旨力除積習而諸弊未別其故何也用人行政之間未能公正耳伏思山西河南兩省荒旱奇災賴十六省官紳商民募化飲助

所捐不下數百萬兩加以撫臣曾國荃除宗瀛向各省告貸竭力籌辦全活多人其中捐輸或米或銀不一而足皆好義樂輸爲救荒起見該省撫臣等目擊時艱亦斷不敢將此等款項虛糜戶部司員念此兩省罹災之慘宜如何激發天良廉潔自持乃風聞河南造冊報銷戶部索費說至十餘萬兩尙不應允山西亦有委員前來辦而未成甚至京官商人捐賑所得獎敘每人名下亦均要照費似此情形殊屬目無法紀可否請 旨飭下山西巡撫河南巡撫將歷捐總數勒限迅速造冊免其開報用項細數並請 飭下戶兵工各部堂官轉飭各司此後無論何項報部不得絲毫索費如有前項情弊一經發覺從重治罪上諭給事中張觀準奏官吏索費請旨懲辦一摺司員辦理部務宜如何潔己奉公約束書吏若如所奏吏部於各省州縣補缺戶兵工部於軍需河工等報銷冊內書吏藉端挑駁任意索費甚至捐輸以及賑款報部司員高下其手殊屬不成事體著該部堂官隨時稽察如有前項情弊即行從重懲辦至山西河南賑款前各該撫奏請開單報銷免其造冊業經允准張觀準所請著毋庸議○諭軍機大臣等吳元炳奏密陳江海防務各摺片暨奏均悉吳淞口爲山海入江要道江海防本屬一氣必須互相聯絡臨事方無隔閡之虞彭玉麟李成謀於輪船駕駛操練各事宜素所諳習著各於每次巡閱長江之便就近赴吳淞口會同李朝斌於常操之外將各兵輪船訓練一次履核勒飭分別賞罰以期互相參證精益求精

精彼此呼應較靈更爲得力○己卯予甘肅肅州殉難文武二千二百六十四員名建立昭忠祠於肅州
○庚辰頒給山西萬城縣 城隍廟大同縣 龍王廟匾額○癸未諭軍機大臣等銘安奏練兵必先擇
將請調直隸通永鎮總兵唐仁廉及在宣化練軍之郭長雲赴古差遣等語該二員現在能否派往若畀
以總統吉林官兵之任是否相宜著李鴻章酌度具奏所請由天津機器局撥給五百斤洋礮二尊三百
斤四尊二百斤四尊馬上洋鎗一千二百桿帶刺步鎗二千三百桿洋火藥三萬斤洋銅帽二百萬顆洋
鉛彈子二百萬粒著李鴻章酌量撥給以資應用○乙酉世泰秀文等奏內務府銀庫從前放項每於庫
期之日各衙門赴庫領款以及 內廷傳用賔辦應領銀兩並各處月例等項該承辦人員持印領赴庫
該庫均如數發放並無批成發放之語原因庫款充裕外交款項亦多並兼有戶部借撥之款領放似覺
從容近年以來庫存款項本屬寥寥外交款項並不按期解到更兼戶部奏停年節借撥之款由此銀庫
之款項入不敷出各衙門一切領款遂至回堂批成發放下餘欠款再行陸續補領月復一月愈欠愈多
積至年節庫存款愈不敷放在該管大臣以及庫官並非籌畫之不周實因來源之鮮旺庫款放項攸關吏
當撥籌久長之計臣等體察情形參酌時勢與其用款不足時形拮据莫若設法變通寬爲籌備查各直
省捐項久停惟戶部尙有常捐之例無論旗民人等皆准報捐虛銜 封典加級各項花樣惟內務府人

員報捐內務府虛銜花樣部捐章程內並無此專條若以此條提歸內務府設立捐局自行派員辦捐不但與部捐無所阻隔且並與庫儲大有裨益至內務府人員報捐加級封典一節仍由部捐照常辦理藉符定制而歸畫一是以臣等不揣冒昧謹擬請旨可否飭下戶部將常捐條例除外旗以及民籍報捐虛銜各等花樣請歸內務府自行酌辦一轉移間庶於內庫款項有所加增且於部捐亦毫無窒礙如蒙俞允並請飭下內務府大臣妥議章程核實辦理至該捐生上兌後即將實收赴臣衙門換照以便互相核對之處再由內務府大臣一併詳細聲明具奏上諭御史世泰秀文奏庫儲支絀放款不敷請量為變通一摺據稱內務府銀庫款項入不敷出必應覓為籌備各省捐例已停惟戶部尚有常捐之例擬將內務府三旗人員報捐虛銜各等花樣均歸內務府自行酌辦該捐生上兌後即將實收赴該御史衙門換照以便互相核對等語覽奏實堪詫異國家制節謹度量入為出自有常經如果內務府放款不敷該總管大臣自當斟酌情形預籌辦理何待該御史越俎代謀瑣屑言利況常捐向由戶部核辦乃世泰等輒請於內務府設局報捐由該衙門核對換照紛更舊章尤非政體世泰秀文不勝御史職任均著回原衙門行走○丙戌以穆騰阿為鑲黃旗蒙古都統調希元為江甯將軍以定安為黑龍江將軍○戊子命前福建布政使王德榜前赴甘肅交左宗棠差委○庚寅上詣奉先殿壽皇殿行禮

○辛卯左宗棠奏臣前因甘肅靈州營參將蕭兆元前辦包頭糧運局務奉文停採撤局乃竟任意遲延並不回營銷差經手採運各批軍糧多未運到且訪聞有侵克貪冒各情弊當經檄飭留夏鎮總兵馬南斌就近確查屬實經臣飭將蕭兆元押解來肅發交安肅道督同肅州研訊詳辦一面奏明革職歸案訊辦轉飭押訊嗣經一年之久僅據呈繳庫平銀五百一十兩零臣因蕭兆元有貽誤軍糧侵蝕軍帑各重情未便任其狡延復經嚴飭監追一面檄飭蘭州府查抄家產變價備抵嗣據蘭州府知府詳報遵將該革員房產器具概行查抄共計變價庫平銀一千一百九十六兩零而蕭兆元在肅監追又經數月屢次提案嚴比並無分賠呈繳查蕭兆元光緒元年奏委赴山西包頭承辦採運糧局自是年三月開局起至二年八月奏文撤局止經手領過湘平銀四十六萬三千餘兩採收各色市斗糧料二萬一千八百餘石合計斤重共該五百六十五萬餘斤分作一百批先後派員押運赴巴里坤糧局交收計用商駝蒙駝運過八十四批漢板牛車運過一十六批內除駝運之八十四批並車運之一二三四五六七三十四十五十六等批均已先後運到取有巴里坤糧局迴批外惟有押運牛車委員李維樞龐清順譚傳發三人管解之第八九十三批共糧一十五萬四千餘斤張文德李和貴兩人管解之第十一批糧八萬四千餘斤楊玉輝一人管解之第十二批糧六萬七千餘斤通共黃小米三十萬八千餘斤內除第十一批

張文德名下承運之半批已據巴里坤糧局續收於四年十月並五年二三月先後三次共收到小米四萬二千餘斤外其餘李維權屈清順譚傳發楊玉輝四人名下承運之四批李和貴名下承運之半批共糧二十六萬四千餘斤迄今四年之久均未運到此項無著糧食計攤採價銀三千一百餘兩運價銀一萬五千八百餘兩二共虧耗銀一萬九千餘兩該革員採辦糧料並口袋繩索等項價值屈寬車駝運腳開局之初商販未集糧道未通物價較昂運腳亦貴迨商販雲集物價減落糧道已通運腳亦省該革員仍照初報價值開報並未隨時請減約共浮冒得採價運腳銀五千餘兩此外該革員罰過運糧遲延車夫羅榮銀五百兩亦未報明列收又每年三節得受各糧行口袋行餽送節禮多寡不等約共得過銀五百餘兩又扣發糧價尼數陸續得過各糧行銀四百餘兩扣發駝價尼數陸續得過各脚店行銀八百餘兩撤局之後又得受各行店餽送盤費銀二百二十兩統計採買糧料雇寬運腳浮冒採價運價並私罰勒扣以及得受餽送各款共銀七千四百餘兩均係侵蝕入己陸續花用屬實前經訪查奏參革職押解來肅發道訊辦巡卹核卷研訊據供前情不諱嚴退侵蝕各款銀兩除已繳庫平銀五百一十兩外餘均由肅兆元花用淨盡無從呈繳其蘭州房產器具祇查抄變賣庫平銀一千一百九十六兩零此外再無寄頓資財及知情容隱之人究詰不移查此案包頭設局採運車糧運赴巴里坤糧局轉運古城原以彼

時官軍進攻北路需糧孔急若由肅州運糧至巴里坤古城勞費過鉅且不能接濟軍食故議由北路利開運道以餉餉軍該革員以二品大員承領至鉅之軍餉辦理萬分喫緊之糧運應如何潔已奉公力籌採運以速事機而副委任乃於領獲之採價運價賤敢侵蝕浮冒並私罰勒扣各款通計積至七千餘兩之多已屬法無可貸且查所報起運糧數內有二十六萬餘斤係光緒二年七八月間報解迄今將及四年並未運到當時官軍連克吉牧地烏魯木齊迪化州瑪納斯各城時懸亟待炊急如星火僅恃古城巴里坤所辦屯糧各局商農漸集兼得歸化城採運接濟多方挹注藉以支持迨官兵迭克各城收穫賊糧又復不少大局始無大虞若專恃包頭一處運糧接濟何堪設想茲查未到之糧共攤採價運價銀一萬九千餘兩勒繳年餘迄無落除查抄家產並據呈繳現銀共祇一千七百餘兩尚不及十分之一似此侵虧公帑貽誤軍糧實與尋常罪犯不同當於訊明後按照軍律立將該革員革職前正法以懲貪劣而儆效尤報聞○乙未諭前據左宗棠奏請以甘肅候補知府王鎮鼎借補秦州直隸州知州經吏部以與例不符議駁茲據左宗棠奏稱仍請以該員借補等語雖為因地擇人起見惟文職勞績保舉候補人員向無借補之例且該省合例各員內豈無堪以勝任之員所有秦州直隸州知州一缺仍著該督另行揀員請補以符定例所請著毋庸議○命前雲南巡撫潘鼎新前赴直隸隨同李鴻章辦理營伍事宜○

湖北荊州駐防創立輔文書院○徐宗瀛奏查陋規固應裁革而辦公亦必需資助如臬司道府等官雖均有應領養廉但自軍興以來皆減成減平所得無多且不比州縣尚有錢漕平餘可資津貼以故江西閩院等省將節壽衙項陋規裁革必酌定所需經費俾得辦公有資細閱該三省原定章程江西係於丁漕解部所餘留作本省公用安徽係專出於漕糧一項福建則因丁漕無幾取給於關稅釐餘今豫省一百七縣州縣有漕糧者僅止五十三州縣西南兩路所設稅釐局卡每年收數無多業已悉充軍餉是不能如福建之關稅釐餘可以挹注卽額徵米亦不及江皖兩省之多既與各省情形互異又無閒款可籌再四圖維惟有酌盈劑虛變通辦理除撫藩兩處向無陋規糧道經營漕務南北兩道兼理河工各有津貼之款無庸再議外惟臬司爲通省刑名總匯需用頗繁道府各缺煩簡雖有不同而辦公需款則一既欲盡革陋規不能不籌給公費以免藉口賠累茲查有漕折項下奏明每石提銀二錢留爲本省辦公之用臬司公費擬卽由此項銀兩內酌量提撥尙有不敷並將司庫核減扣存開封府每年應領發審修金等項一併提歸臬司以補不足統由藩司按月移解收用將來漕米仍徵本色所提漕折之款卽由糧道改於漕耗各州縣應領運腳項下動支其南汝光河陝汝兩道暨開封等九府公費擬於所屬州縣內除苦缺不計外核其平餘多寡酌量派提銀兩卽由該州縣按季經解該管道府不必再解司庫以免領

解之煩所有銀數均係按照該司道府摺開出款酌定計尙足敷公用其一切陋規悉予裁革並將攤捐各款核明解餉盤費秋審費耗各府辦理發審案件歲科考試經費文武鄉試書牘貢差盤費降冬粥廠貢院渡船監獄等項工程京省各提塘報資津貼各衙門書吏飯食紙張等項皆係每年應需之款仍舊存留分別扣廉捐解其餘原定清查軍需報銷各局經費候補通同薪水道府到任鋪墊執事司庫房銀冊紙張等項全行裁汰各衙門書吏冊費一體裁四留六等情詳請具奏前來臣查陋規一項上官取之州縣州縣取之百姓上下相求誅求無厭卒至官民交困貽害靡窮臣素性迂拙視此陋習痛恨實深自登仕版以來惟以硜硜自守卽門包等項亦經一律禁革從不准收受分文且於接見僚屬時諄諄告誠務各潔己奉公以期吏治日有起色風聞僚屬聞規向有節壽季章潛規等項名目到豫後卽欲一併革除茲經委員陸續查明督同藩司概予永遠禁革並將攤捐各款核明實係必不可少者酌量存留餘悉裁汰各衙門冊費亦經裁四留六統計裁去各項每年共銀九萬餘兩臬司道府各按摺開出款分別酌給公費通飭一體遵行俾各辦公有資無所藉口報聞○內中岑毓英奏上年奉 命撫黔目睹邊隅地瘠民貧卽深以度支竭蹶爲慮因綜核全局非改勇爲兵裁汰冗員則食不寡而用不舒似難支持久遠是以體察情形縝晰具奏奉 旨次第辦理完竣在案現在黔省防守要隘皆係綠營馬步戰兵雖

明爲練軍而人數悉照兵額營名皆遵舊制所擬章程奉 旨交部核議一俟奉到卽造冊咨部查核其
各城池汛塘仍飭各營照額補足守兵認真防守此黔省防勇早經改補兵額並無另留勇營之實在情
形也至黔省各局在前捐例未停局數較多糜費亦所不免停捐以後入款無幾各局大半裁撤迫 臣抵
任後遵 旨通盤籌畫力求撙節凡可裁之局可減之費俱督飭司道裁減殆盡如城防保甲採訪忠義
清查田業等局均已併入善後總局辦理其礮屯誌書等局早一律裁撤計所留善後撥金報銷教案轉
運各局司事不過百餘員每年員役薪工局費共需約銀三萬六千餘兩實爲必不可少亦必不可再減
之款查黔省未經 臣奏請裁減以前每歲開支銀三百餘萬兩至少亦須開支銀二百八十餘萬兩報銷
咨部有案可稽上年十月自經 臣裁減之後每歲祇需銀一百八十萬兩較頻年每歲已節省銀一百餘
萬兩三年後將舊欠彌補清楚善後辦理完竣仍可再行核減曾經奏奉 諭旨交部議核在案此黔省
各局已經裁併並無浮費之實在情形也下部知之○諭 穆宗毅皇帝實錄 聖訓告成所有尊藏盛
京皇史宬本內 廟諱御名應仍循舊章照本字恭填著派寶璽桂董恂廣壽恩承徐桐潘祖蔭敬謹
填寫限一日竣事以昭虔肅○丁酉以孟夏時享 太廟 上前期親詣行禮○諭前諭李瀚章傳旨飭
令已革雲貴總督張凱嵩來京茲據李瀚章奏稱張凱嵩業已啟程等語著俟到京後交吏部帶領引見

聽候諭旨預備召見○諭都察院奏據舉人邱敏光等以空禮在籍副將林文明被殺冤抑伊母林戴氏迭次京控案懸未結懇爲奏請提京仲雪等詞赴該衙門呈訴此案迭經降旨令該督撫迅速加結嗣據何璟奏明案情後諭令勒限嚴緝林萬得等歸案訊辦現在逸犯是否弋獲未據奏報仍著何璟等嚴行訪緝務獲依限訊結毋再遲延該舉人等所懇提京審訊之處著毋庸議

東華續錄

光緒三十四

臣朱壽朋敬編

臣章圭豫恭校

夏四月庚子大祀 天於 圖丘遣載敦恭代行禮○辛丑前任鑲黃旗都統明慶卒命輔國公載瀛前往奠醴賜祭葬賞其子乾清門侍衛愛隆頭等侍衛○壬寅郭嵩燾奏查左都御史 臣崇厚在俄國立定條約十八款不察山川阨要之形勝不明中外交接之事宜種種貽誤無可追悔然西洋各國遣派使臣相與議定條約原應由各國覈准施行是此案准駁之權仍制自 朝廷所有派遣駐紮各國使臣但係兩國交涉事件應責成料理總理衙門可但論飭駐俄公使轉達俄國外部伊犁條約暫緩覈准權聽俄兵駐紮伊犁以俟續議俄人雖甚猖獗亦不能違越萬國公法以求狂逞祇權應之一法可以稍戢俄人之志卽在我亦稍有以自處 臣請統前後事情爲我 皇上分別陳之一曰收還伊犁應由甘督核辦乾隆年間戡定準回各部設立各城駐紮兵弁外設屯卡與各屬部畫分疆界百餘年來哈薩克布魯特諸部日見衰微其地多爲俄人侵佔又西滅浩罕諸部與西域壤地緊相毗連而自回疆畔亂二十餘年屯卡毀棄殆盡卽令俄人繳還伊犁一城清理疆界極費推求陝甘督 臣左宗棠平日講求地理之學經營

西域已逾十年形勝險要爲能詳知並非數萬里外遣一使臣憑空定議之事。所謂收還伊犁應由甘督核議者此也。二曰遣使議還伊犁當徑赴伊犁會辦俄人占踞伊犁時但以保護疆界民商爲言原約中國平定西域仍行退還。是收還伊犁并無他慮。惟慮俄人索取兵費太多此須至伊犁相度情形乃可置議。左宗棠以戰功平定西域不肯居贖回伊犁之名。揀派大員會議籌辦亦專在此無舍伊犁而徑赴俄會議之理。卽令議辦已有端緒。應遣使赴俄定約亦必須由肅州取道伊犁兼與左宗棠商定一切。臣在倫敦日本遣使恩倭摩的赴俄議換庫頁一島卽所謂蝦夷島也在該島爭持多年乃遣使赴俄計議其使臣卽由庫頁島徑達黑龍江取道伊犁繞烏拉嶺赴俄爲其水陸交通險隘形勝及其兵力所注非身親考覈無由知也。俄酋高福滿駐紮伊犁兼統浩罕諸部其與崇厚議還伊犁二萬里調高福滿回國會辦此在中國關係絕大而在俄人則進退皆利無關得失之數而其任勞數實如此。臣所謂遣使議還伊犁當徑赴伊犁會辦者此也。三曰直截議駁伊犁條約當暫聽從駐紮其勢萬不能急速收還。臣查天山南北兩路所以號稱肥饒者正以河道縱橫漕輸之故。俄人所踞西伯利部一萬餘里並屬荒寒之地近來侵奪塔什干浩罕諸部蓄意經營前歲見俄國新報言其提督斯哲威爾探尋巴米爾耶格拉湖一帶報稱喀拉庫湖至阿克蘇有通長不絕河源深入俄國荒漠之地爲歷來人跡所未到舉國相爲慶

幸其睨視西域蓄謀已深伊犁一城尤爲饒沃自伊犁河以南曰哈爾海圖產銅曰沙拉博和齊產鉛其北山曰空鄂爾峨博產煤曰關里營產金曰索果產鐵往時河南設有銅廠鉛廠並近距特克斯河而辦理不甚如法山北煤鐵各廠則尚未開採西洋人羣視爲上腴之地伊犁所設九城專駐兵弁其膏腴地在河南山北西至霍果斯亦設有一城距伊犁不逾百里所設額爾齊齊等卡皆在五百里以外今齊分霍爾果斯河屬之俄人則伊犁一河亦截去四之三而五百餘里之屯卡皆棄置之矣盡分特克斯河屬之俄人則獨設銅鉛各廠亦與俄人共之而特克斯河橫亘天山以北其南直接庫車拜城整氣皆致阻隔所設屯卡直達特克斯河源皆棄置之矣塔爾巴哈台距伊犁東北尚在千里以外固亦有畫歸俄人之地以一城孤懸洋寄盡割斷其膏腴之地名爲收還伊犁而實棄之此時置議較之從前其難萬倍當據萬國公法由國家徑行議駁無可再行面辦之理以此時獨棄伊犁與收還伊犁其勢并處於兩窮惟有申明權聽駐紮以杜其狡逞之心而仍以從緩計議稍留爲後圖庶自處於有餘之地而亦有餘地以處俄人臣所謂直截議駁伊犁條約暫聽俄人駐紮者此也四曰駐紮英法兩國公使不宜遣使俄國西洋各國互相聯絡各視其國勢緩急輕重與其恩怨以爲之程數百年來攻伐兼并事變百出而目前大勢則英法兩國爲私交俄德兩國爲私交德與法仇恨方深英與俄尤爲累世積怨其心意所向皆

卽其喜怒好惡亦皆爲之轉移

臣

嘗謂英法共一公使俄德亦當共一公使凡爲公使駐紮非但以虛名

通兩國之好而已實有維持國體之責與商辦事件之權遣使會議當在伊犁而其難通之情與其兩不

相下之勢由駐俄公使達之俄國朝廷以持其平而分其責此亦萬國公法所當準情據理通論其節

要者似此加派使臣改議已定條約恐徒資俄人口實以肆行其挾制之術俄國新報已言伊犁條約由

英人播弄翻悔亦可窺見其用心矣臣所謂駐紮英法兩國公使不宜遣使俄國者此也五曰定議崇厚

罪名於例本無專條亦當稍準萬國公法行之臣查崇厚貽誤國家原情定罪無可寬假然推其致誤

之由一在不明地勢之險要如霍爾果斯河近距伊犁特克斯河截分南北兩路均詳在圖志平時略無

考覈俄人口講指畫乃直資其玩弄一在不辨事理之輕重其心意所注專在伊犁一城則視其種種要

求皆若無甚關係而惟懼繳還伊犁之稍有變更一在心懾俄人之強而喪其所守臣奉使出洋以崇厚

曾使巴黎就詢西洋各國情形但言船廠之精兵力之厚以爲可畏崇厚名知洋務徒知可畏而已是知

其勢而不知其理於處辦洋務終無所得於其心也一在力持敷衍之計而忘其貽害臣在巴黎與崇厚

相見詢以使俄機宜僅言伊犁重地豈能不收回頗心怪其視事之易而亦見其但以收回伊犁爲名於

國事之利病洋情之變易皆在所不計故常以謂於西洋交接亦當稍求通悉古今事宜中外情勢而後

可以應變是以崇厚之罪人能知而能言之而當定議條約之時崇厚不能知也攜帶參贊隨員亦皆不能知也置身數萬里之遙一切情勢略無知曉有聽俄人之恫喝欺誣拱手承諾而已 朝廷以議駁條約加罪使臣是於定約之國明示決絕而益資俄人口實使之反有辭以行其要挾崇厚殷實有餘官責令報捐充餉贖罪而無急加刑以激俄人之怒卽各國公論亦且援之以助成俄人之勢臣所謂定議崇厚罪名當稍準萬國公法行之者此也六曰廷臣主戰祇是一隅之見取宜斟酌理勢之平求所以自處而無急言用兵臣查西洋構患以來凡三次用兵廣東因禁烟寧波天津因換約皆由疆臣措置失宜以致貽患日深積久而益窮於爲計然其時中外之勢本甚懸絕一切底蘊兩不相知徒激於廷臣之議論憤然求一戰之效至今日而信使交通准情理處自有餘裕俄人之狡爲思逞又萬非比英法各國專以通商爲事弊端一開構患將至無窮 國家用兵三十年財殫民窮情見勢絀戰道光咸豐時氣象又當遼遜俄人蠶食諸回部拓土開疆環中國萬餘里水陸均須設防力量有所不及卽使俄人侵擾邊界猶當據理折之不與交兵角勝何況以伊犁一城遣使與之定議准駁應由 朝廷縱彼以兵力要挾亦可准度事勢之宜從容辨證何爲貿然耀兵力以拼毀端取快廷臣之議論臣所謂廷臣主戰祇是一隅之見者此也竊以爲 國家辦理洋務當以了事爲義不當以生釁構兵爲名名之所趨積重難返雖稍知

其情狀亦爲一時氣餒所懾而不敢有所異同臣之竊味直知今日之急務固不在此應懇 天恩飭令駐俄使臣轉達俄國外都以伊犁一城爲天山南北兩路關鍵中國必待收回而此次崇厚所定條約萬難敷准所有俄兵駐紮伊犁應暫無庸撤退從前喀什噶爾曾經與俄通商應否照舊舉行之處由陝甘督臣左宗棠與俄國將兵大臣會商裁辦以期妥善毋得輕易率請用兵致失兩國交誼開誠布公正辦明辯既成督臣妥爲經理或冀挽回萬一以後與俄人交涉亦可於此稍得其端倪關係大局實非淺鮮臣以庸愚奉使無狀萬口交謫無地自容積年以來心氣消耗疾病日增里居踰歲足跡未嘗一出門戶自分衰病餘生無復犬馬圖効之望而軫念時艱重以崇厚之昏庸貽誤多端幾至無可補救臣於洋務粗有所見誠知一時公論於此必多觸悟然求之事理徵之史策準之 國家之利病驗之各國之從違允宜及早斷行以免多生枝節爲時愈久議論愈繁則益難於處理是以不敢避謫譏而終甘緘默諱略獻其愚忱上備 聖明採擇 上諭軍機大臣等本日據郭嵩燾奏俄人構患當籌補救之方一摺不爲無見前經總理各國事務衙門奏明將俄國約章分別可行不可行咨行曾紀澤遵照妥辦原就已定之約權衡利害以爲辯論改議之地第思俄人貪得無厭能否就我範圍殊不可必此時若遽與其交還伊犁全境而於分界通商各節未能悉如所願操之太盛易啟齟齬若徒往返辯論亦恐久無成議曾紀澤

前往俄國當先將原議交收伊犁各節關繫中國利害礙難叛准之故據理告知看其如何答覆如彼以條約不允不能交還伊犁亦祇可暫時緩議兩作罷論但須相機引導歸宿到此即可暫作了局惟不可先露此意轉致得步進步別有要求至條約分界通商事宜及應修約章本與交收伊犁之事不相干涉俟事定之後當再令左宗棠及總理各國事務衙門分別辦理此意亦可向俄人告知也郭嵩燾摺摘鈔給與閱看將此密諭知之○甲辰追予陝西陣亡游擊范興盛建祠○乙巳諭軍機大臣等貴州安順府知府汪炳璈著岑毓英悉心察看如竟不能勝任卽行據實奏聞毋稍遷就○丙午吳元炳奏新任浙江提督吳長慶帶營防江請暫緩赴任允之○命道員顧燠熙知府李金鏞知州員啟章知縣查宗仁前往吉林交銘安酌量差委○丁寶楨等奏等於本年二月初六日承准軍機大臣字寄光緒六年正月二十二日奉 上諭昨日據王大臣等奏請籌餉節流等語等因欽此遵 旨寄信前來臣等忝膺疆寄目覩時艱凡可以籌畫國維敢不力求撙節卽飭籌餉報銷局司道查議去後茲據該司道等覆稱查咸豐十年川省軍興以後節次招募營勇雖時有裁減亦時有增添大抵裁者少而增者多至同治七八年共計楚黔川勇多至六萬餘名歲需餉銀三百餘萬兩嗣經前督臣吳棠斟酌情形陸續裁撤截至光緒三年止僅存營勇一萬數千餘名歲需餉銀一百一十餘萬兩較前節省一百數十萬兩而庫儲搜括已

空度支仍苦不繼是年三月臣寶楨蒞任查悉前情時以籌餉日艱民生日促爲慮因川省幅員太闊西北一帶數千里全屬夷疆東南則與滇黔三面接壤橫袤亦數千里存勇不敷分布勢難再減遂訪求大利所在開辦黔邊鹽務並督同司道整飭交代釐金一面將營勇之疲弱者撤換歸併又以川省所用楚勇口糧過重大加刪減概照東南章程支發計每歲實省銀十數萬兩復因鹽務開辦後司庫拮据將安定全營月餉改令黔邊局自就鹽務辦款供支不准動司庫丁津捐撥分毫亦不准動該局所收鹽務稅羨截釐各正款計每年又省庫儲銀十四萬兩有零是皆於時事艱難之會設法節省現查兩年以來川省夷氛雖較安靜而夷性犬羊時虞出巢滋擾其界接黔滇各境伏莽實多內地之輻匪會匪均匪各邊界游勇散練不時出沒處處均須防捕除安定營及峨馬雷越四屬土勇外僅存營勇一萬二千九百餘名以之分布邊防隨地要隘尙形單薄而節省正款餉項通計已及二十五六萬之多司道等再四籌商確實情形實無可再裁之勇再併之營若必曲爲裁減設有他故轉虞格外糜費此川省勇營僅敷分布勢難再減之實情也查川省現在各局如籌餉報銷局捐輸釐金局洋務局採訪忠節局各有專辦之事不能不分設各局用專款成此數局中應用委員書役人等薪工紙張伙食等項亦經臣寶楨於到任後分別裁減歸併現在各局人數實祇勉敷辦公並無一員一役浮多至省外分設各卡局所以重抽收而

防偷漏非此則稽查難周弊端叢起餉源益絀若裁去一員必立減一卡一局之釐於餉項轉覺有損至局用員役人等薪水多寡不一向惟籌餉局每年准報銷書吏口食銀二千數百兩採訪局每年准報銷員役薪糧銀二千四百餘兩俱由外城事務給從前朦朧虛浮誠所不免自軍實積廢加整飭涸滴歸公近年各項釐金較前豐旺並無以前積弊司道等悉心體察亦無可再減之局再減之費此各局皆有專責勢難議減之實情也等情具詳請奏前來等因竊以盡職之道當以國計爲先而國計與民生實相維繫果能少一分浮費即多增一分餉源所謂下恤民生即以上裕軍儲者也惟川省勇丁前已迭次大加裁併就日前時勢而論實難再減但既奉諭節省自不能不於萬無可省之中酌量核減用濟急需除安定營勇分紮滇黔兩邊道里綿長且須時時護送商賈巡緝私匪現在該局規辦黔滇各邊營務甫有成效未可議減且該營勇餉又係由馬炯於鹽務項下全數自行設法籌撥不動正款分毫於帑項已屬節省仍請照辦外其餘各營現存勇一萬二千九百餘名察餉情形雖稍爲裁減尙可勉供支持茲擬令於每營勇數裁減一成計每年可省銀五萬餘兩之譜俟裁定後再行造冊咨部備查以昭核實此外各局員役委無可撤亦請照辦臣等惟有隨時隨事極力體察如有可以設法騰挪節流濟餉之處再行奏請辦理若意存瞻徇或安頓勇丁或調劑統領營官及聽委員等一面之詞遷就塞責不特有所不敢抑

且有所不忍惟就時勢反覆斟酌不能不內外兼權期於無誤下部知之○庚戌李明坤奏光緒六年二月初三日承准軍機大臣字寄正月二十二日奉 上諭據王大臣等奏議辦邊防籌餉節流等語一摺等因欽此查湘省素非財賦之區向來制用一切並不寬綽近因釐務減色撥款繁多經費日益艱窘是以臣於上年十月到任後即將駐防黔省各軍調回楚邊扼紮分別裁撤勇丁二千二百餘名旋又將本省水陸防勇次第核減計又裁去二千一百餘名共裁勇四千三百餘名每年可節省餉銀十餘萬兩業於上年十一月本年正月先後具奏在案現甫經兩次裁減之後若驟議再減恐勇力過單不敷分布湘省地方民情久邇 聖明洞鑒未敢稍懈防維臣惟有隨時察看情形如果地方日久安靜再當續請遣撤以免顧此失彼至湘省現存各局在從前設立之初均係因時制宜斟酌派委員紳各有專司薪糧尙無虛冒茲奉 諭旨飭令裁併自應懷遵籌辦期於款項可資撙節而公事仍不致曠誤除督銷局係歸兩淮主政應聽兩江督臣酌核辦理外溯自咸豐二年省垣設立軍需總局同治十二年改為善後局爲通省支發總匯之所事務極形繁重因於咸豐十一年分設報銷一局專司銷算造報現在軍需報銷將次辦竣同治十二年六月以後應歸善後報銷用款較少毋庸另設專局擬即歸併善後局辦理又同治十一年奏明在於省城設立保甲局辦通省清查保甲事宜臣到任後復爲之更定簡捷章程責成各局

專以查拿土匪外盜爲先務辦理頗著成效又長善團防局專巡省城內外街道盤詰奸宄本與保甲相輔而行現擬即將團防事務歸併保甲局合辦又長沙轉運局芷江黔陽軍米局均爲前此援黔各軍便於解運軍火接濟軍食而設現在黔營均已調回業將此二局一併裁撤用剩軍火穀米等項飭交地方官經營應候撥用又製造機器局係光緒二年新設仿造洋鎗各件每月籌撥銀三千兩四年餉項支絀減去一半五年復減爲每月支銀一千兩現防營減少應需軍械無多擬將此局暫停製造此外則省內外釐金總分各局咸豐五年創抽之始百貨與鹽茶釐金先係分局舉辦同治初年合而爲一統名曰釐金鹽茶總局因通省地面寬廣水陸紛歧先後於各處分設局卡或司抽收或司稽查每局員紳不過數人卽司事巡役亦僅數差這頻年支應防軍月餉及撥京協各款均恃此爲大宗近來收數不旺固由于口稅單盛行亦未始非奸猾商販繞越偷漏此時若將各處卡局分別裁撤歸併所省薪糧有限實恐偷越愈多而收數更絀現與該局司道熟商擬將通省員紳書役薪糧等款一律量加刪減局卡仍循其舊以期無礙餉源以上總計裁併各局及刪減員紳薪糧每年共可節省經費銀四萬餘兩雖明知爲數無幾於邊防要需無裨率第當此度支匱乏之時亦惟是多省一分費用冀多一分實濟湘省局面止此竊非敢有所瞻徇下部知之○辛亥 上諭 大高殿祈雨○壬子廣英奏准籌兩江督臣吳元炳咨開

准戶部咨具奏時事艱難急應籌備餉需摺內有通核關稅一條光緒六年正月二十五日奉 上諭此次戶部所籌各節除停止工程核實折價應由該部籌辦外其餘皆疆臣之責等因欽此查淮安關虧短情形歷經奏明在案卽此次部 臣條奏亦稱虧短有因人所共見共聞毋庸再爲廣陳第職守攸關當此國用浩繁之際奴才不敢畏難苟安自當因時制宜變通辦理以爲得寸得尺之計伏查江蘇海州贛榆縣之青口鎮地方外通大洋照例止准贛榆一縣黃豆運往瀏河羅竇其豆餅及一切南北雜貨概不准由青口出入並黃令海州沭陽文武員弁輪赴青口同准關監督派員巡查立法本極周密惟青口距淮數百里道路較遠查禁止屬具文是以同治七年前監督惠志曾有移設稅口之請旋經前兩江督臣馬新貽等以青口鎮例止黃豆一項出口其雜貨僅供本境食用卽海州沭陽所出豆餅等物悉由淮關及地方文武輪流查禁若驟議設關無裨國課有礙商民等因覆奏在案奴才上年到任後復經密派妥人前往查訪該處油房甚多豆餅豆油最鉅其餘雜貨亦復不少歷年違禁航海赴蘇松一帶銷售回空卽帶南雜貨物往返皆無關稅奴才周諮博訪海關餅油等貨本應由鹽河販運南下經過淮安關之永豐口照例納稅其南貨之運往海關者亦同此例旣由青口違禁出入是以永豐口無從徵收卽淮安正關亦偕形減色若照例巡查固屬空言無補若拘於成案仍於稅務有妨奴才晝夜籌思別無善策惟有

將承豐口移設青口地方凡南北一切貨物悉按淮安關則例照章徵收仍嚴禁胥役之需索棍徒之詐擾俾商民樂業踴躍輸將一轉移間稅務必可暢旺而口岸並無增添似於國課有裨商情無礙下戶部議奏○癸丑諭譚鍾麟奏遵查荒地情形等語據稱浙江杭嘉湖金衢嚴等屬續經查出荒產爲數甚多殊難憑信其故一由民間相率欺隱一由地方官含糊挪移其中莊書里保書辦等勾串劣紳挾制官長使漁小民弊端百出近日嘉興委員提訊莊書輒敢邀集多人辱毀官長與劣生挾嫌聚衆入城拆毀衙署等情此風斷不可長著譚鍾麟卽飭分委各員密拿首要各犯解省訊辦如敢抗違卽行從嚴懲辦以儆效尤務將各屬荒熟分數澈底清查杜欺隱之端杜中飽之弊期於國課民生兩有裨益○甲寅左宗棠奏甘肅番民一種雜居邊外性與人殊南路黑番向隸土司管轄兇狡尤甚上年循化廳屬什吉六倉番匪滋事經河州鎮總兵沈玉遂督辦剿撫兼施事竣出示通諭番番安分守業毋爲刑戮之民因番民不識漢字並飭於示內旁注番字俾其易曉各番安之適階文西因地震成災洮州屬土屬黑番四旗亦同時具報等情等飭委章奏階道譚繼洵察勘被災輕重實在情形分別賑撫並委前署章奏階道龍錫慶前赴被災最重之階文等處地方督辦賑務兼修治城渠以工代賑其於各番旗尤加意撫恤均各得所本年三月初八日接據龍錫慶稟繼洵等稟報據階州知州文治辦理階州賑務委員前署階州知州石

本清署階州營遊擊管帶安左旗防營記名提督陳再益等稟稱距階州九十里瓜子溝地方有土屬番民謠傳活佛出世聚眾朝拜並舞刀跳神口稱劫運將至惟跳神得免番眾如醉如癡互相傳播煽聚日多並據署洮州土司楊作霖岷州嚴昌土司馬承烈稟報正派土千總李撫西隨同委員發給被災番民賑糧銀錢時探悉瓜子溝黑番陽山旗內謠傳上年五月十二日該處生有活佛其父古旦巴算卦應驗藉此煽惑附近番民朝夕禮拜又稱活佛有旨刀鎗作祟應將刀鎗帶赴瓜子溝繳驗旋接雞毛竹令追令各番族聚會風謠紛起一日數驚該土司等諭禁不聽請備以兵威等情龍錫慶等出示曉諭以禍福亦未解散等批飭由該地方官督飭土司先行開導務令迅速解散如仍執迷不悟立即調兵勦捕旋據馳報古旦巴營令乃驢鐵端河陰山陽山陵家山等處番族每戶派精壯男丁一二名隨其作亂山西固階州入川大事可成不從者殺番眾頭裹紅巾成羣跳舞口稱降神狂叫不止反形大露龍錫慶等布置階州西固城守委同知蕭廷元等督團家嚴扼殺賊橋等飛飭陳再益妥籌防勦調秦州遊擊田連考駐紮帶昌防營提督張佑庭程文勝各帶所部步隊馳往會勦飭河州鎮總兵沈玉遂派副將沈福田馬占澄帶馬隊四旗機總理關內營務署蘭州道劉啟白帶步隊一營前往會督各營勦辦務期分別良匪以布恩威而安反側旋據龍錫慶等續報匪番放火搶殺勢甚猖獗三月初六日已將西固州同所轄

哈河壩民堡攻破幸殺賊橋團丁關營馳援哈十族良番巡麻點住並五坪老民八種寺大喇嘛等同時率眾截擊殺賊極多餘逆四路紛竄生擒逆首哈力等二十名分解西固階州龍錫慶提訊哈力供稱係岷州土司馬承烈所屬西岔災人上年十一月內瓜子溝番民百旦巴信約該逆同謀起事百旦巴曾伊妻王氏於五月十二日地震時產一子生即能言自稱活佛地震之事由其執掌煽動各番族朝佛朝拜之人霎時遍身發顫站立不穩有當時顫跳者有回家後顫跳者每發顫則一二時不省人事百旦巴說他家出有真人可以起事不從者有災地震不止從者無事已約有四千餘人哈力正糾串西岔家岔各處番族千餘人候信二月二十八日百旦巴傳雞毛令箭約於三月初三日起事從哈河壩漢民堡動手再攻西固階州走川大事可成初五日百旦巴同哈力喊番眾二千餘人攻哈河壩民堡初六日甫將民堡攻開忽殺賊橋團勇齊至五坪良番團練勇出攻擊遂被番團擒送到官餘賊供同訊明正法傳首梟示內有雙佳一名訊係被古旦巴迫脅並非甘心從賊即予釋回初八日陳再益帶所部親兵及階州制兵防勇進距州城一百一十里之殺賊橋地方初九夜有距殺賊橋四十里南峪寨漢民諸兵救援橋番匪攻堡甚急初十日天明抵南峪寨而賊已退踞離寨十餘里之黑松坪調知內有大小賊目十數賊眾約七八百人陳再益潛師急進派左哨繞道山脊以截其後自帶中哨及親兵防勇由貓兒寨直搗其

巢匪勇繼之五鼓抵黑松坪匪始驚覺出巢抗拒陳再益歷隊衝殺前後夾攻鎗礮齊施刀矛並舉匪勢不支獲巢敗遁官軍整隊追之陣亡一名受傷十餘名等會商此次黑番謀變實由妖言煽惑所致別無起釁情由番民一聞兵圍入境即去逆效順不約而同並縛獻番匪明心跡是良匪已分餘逆雖苟延喘息而官軍又獲黑松坪之捷事機尙順現飭各營勒兵境上諭令良番縛獻首要各犯照格給賞各營暫時勿稍深入加委道員劉璣馳往督辦苦心分明勿濫殺以逞兵威勿寬縱而貽後患庶番族相庇以安免罹浩劫而 皇仁洽於殊俗異患全銷矣 上諭軍機大臣等左宗棠等奏番匪滋事兵圍剿辦獲勝現籌辦理情形一摺甘肅階州瓜子溝地方番匪古旦巴造言生有活佛煽惑番民脅令已屬等處番族各派壯丁隨其作亂攻破西固州同所轄哈河壩民堡並聲稱由西固階州走四川等語經左宗棠等飭派總兵沈玉遂署蘭州道劉璣等會同剿辦擒獲逆首哈力等二十名訊明正法并將黑松坪賊巢搗破現飭各營諭令良番縛獻首要各犯暫勿深入番地辦理尙爲妥協仍著左宗棠楊昌濬督飭兵團分別良莠寬嚴互用以期番族相安迅速肅清該匪既有入川之語並著丁寶楨加意防範如有餘匪竄擾立即派兵剿辦毋任貽患地方將此由五百里諭知左宗棠丁寶楨並傳諭楊昌濬知之○左宗棠奏新疆善後事宜以修洛河渠建築城堡廣興屯墾清丈地畝釐正賦稅分設義塾吏定貨幣數大端爲

最要臣前奉諭旨南北各城應如何隨宜經理之應即著悉心籌畫次第興辦比部恭錄咨行南北兩路在事諸臣一體欽遵旋准張曜劉錦棠咨呈并據前署鎮道周鼎傳現任鎮道馮繼祥吐魯番局務道員雷登遠稟報前來以修濬舊之哈密修石城子渠鎮西廳修大泉東渠迪化州修永豐太平二渠安順一渠綏來縣修長渠奇台縣修各渠吐魯番所屬渠工之外吏開鑿坎井一百八十五處庫爾勒修復舊渠四十里庫車濬築阿柯寺兩大渠皆各防營將領督飭防營兵勇輪替工作其兼用民力者給以雇值地方官募民興修者亦議給工食誠以民困甫蘇未可責以力役也以城堡工作言之居國屋宇以利棲止農商工匠之所宜也行國旣遷移逐水草畜牧游獵之所便也今既聯異域爲一家則城堡不可以不設奇台綏來喀喇沙爾庫車或因舊基或拓新地均不勞民力不耗公財而崇墉屹然足資保障以屯壘晉之鎮西廳屬兵民報墾五萬數千餘畝奇台縣墾民戶九百有餘軍營新墾六千六百餘畝迪化舊報承墾三千餘戶核多浮冒茲按冊報連新增民戶實只二千有奇軍屯尙未據報畝數吉昌新舊墾戶共一千三百有奇綏來共九百餘戶吐魯番及南疆八城除沙磧外荒地漸少新增屯墾均在新開渠工兩岸未據冊報畝數其熟地適當清丈之際劉錦棠張曜現飭各局員冊報俟清丈竣事始可彙齊送核也以清丈言之量地即履畝之法長短廣狹非丈量不能明肥腴瘠薄非按測不能準而西北地多

高仰土性膏滲需水尤殷水足者地價倍昂以產糧多也水歉少收價亦隨減將欲則壞成賦必先計水分之充絀定地畝之瘠饒科糧賦之輕重光緒四年徵收無額臣與劉錦棠張曜周崇傳函牘相商仿古中制而更減之按民間收糧實數十一分而取其一經收回自任意增減者許戶民自陳印委各員傳經手人斥責甚著加以革黜并令於收穫後通行清丈按地畝肥瘠水分贏絀分九等科賦地既廣闊創行之初事體繁雜人役弓手多不諳熟一時未能集事旋改爲上中下三等征收以取簡易迨五年秋成册報猶未造齊仍照上年十一分取一之例征收民間輸將爭先約計六年秋穫丈量可竣按畝科賦多寡始歸一律矣以賦稅言之鎮迪一道光緒四年分徵收各色京斗糧六千九百四十餘石房租銀六千一百餘兩吐魯番屬征糧一萬四千二百餘石地課銀二千一百餘兩喀什噶爾征收各色京斗糧料六萬五百八石英吉沙爾征收二萬六千一百二十二石葉爾羌征收七萬九千四百二十二石和闐徵糧三萬六千八百七十九石徵折色銀五千四百九十九兩課金四百六十兩阿克蘇徵糧一萬四千二百三十石徵折色銀三千三百三十八兩徵紅銅黑鉛礮鐵均照額交納烏什徵糧八千三百七十八石徵折色錢五百一十緡庫車徵糧一萬二千八百四十九石徵折色銀五千餘兩徵紅銅棉花如額光緒五年秋開徵仍按照四年徵收款目如數完繳內如喀喇沙爾一城因久罹兵燹流亡未復四年無徵五年分據各局報徵過

各色京斗糧六千五百九十八石尙未截數綜計南北兩路徵收糧數折合京斗已二十六萬一千九百餘石而專就南路收數計較戶部鈔案從前額徵十三萬餘石已增十萬六千五百石有奇此皆清丈未竣暫照十一分徵收之數若丈量完事併加入北路續增及開渠成熟地畝新賦合算自更有增無減此外稅課折色有照常徵收者有併入釐稅徵收者就釐稅言之各局冊報自四年秋冬至五年夏不足一年已收銀十八萬有奇亦稱入款大宗如伊犁事定商賈暢行則釐務自有起色姑勿論也以義塾言之新疆戡定已久而漢回彼此扞格不入官民隔閡政令難施一切條教均藉回目傳宣疆祇特將欲化彼殊俗同我華風非分建義塾令回童讀書識字通曉語言不可不與南北兩路在事諸臣籌商飭各局興防營多設義塾並刊發千字文三字經百家姓四字韻語及雜字各本以訓蒙童續發孝經小學課之誦讀兼印楷書各本令其摹寫擬諸本讀畢再頒行六經俾與講求經義並據防營局員稟興建義塾已三十七處入學回童聰穎者多甫一年而所頒諸本已讀畢矣其父兄競以子弟讀書爲榮羣相矜寵並請增建學舍頒發詩經論孟資其講習局員送閱各經蒙童臨摹倣本筆姿頗秀並稱蒙童試誦告示皆能上口教以幼儀亦知領會蓋讀書既可識字而由聲音以通言語自易爲功也張曜因出 聖諭十六條附律易解一書中刊漢文旁注回字刊發羣民見者寶貴足見秉彝之良無中外可分欲善則善理有

固然雖不必化民成俗而其效已可觀也以貨幣言之回民市易舊用制錢漸專用銀而腥色高低分量輕重驟難明晰奸僞日滋阿古祖竊踞南八城制鑄銀錢名大罌式圓如餅中無方孔不類錢形其腥色分量任意低減圖售其奸故市價相權不能允協民以爲苦應改造銀錢以平市價而利民用惟改造銀錢宜先製模式較準一律交官設局經理然後私造與廢僞易於辨認而行使可規久遠臣飭蘭州製造新式銅模交張曜督局依法試製範銀爲錢用銀片捶成不須鑄枚重一錢外圓內方輪廓分明字蹟顯明大小厚薄如一與制錢相權銀爲母銅爲子市廛通用可免畸重畸輕之患而新模精巧由官改造工速費節私贗不致混淆人知寶貴准張曜呈送樣錢前來臣察核無異擬俟試行漸廣請 旨遵辦期爲新製創此永利以救閭閻之窮凡茲數端均已有序可尋漸著成效者也至於中土蠶絲賴及萬方而湖產尤甲中土泰西市舶駢集滬上航海往返費省運捷非若陸路之艱阻也西北各部落行國居多衣被廬帳取給氈片禹貢於寯崙析支渠搜皆以織皮概之由來久矣近代以來參用蠶絲和毛彈織精緻殊倫售獲善價惟與中土通商專在陸路運致維艱新疆南北產桑土人但取葦代糧或稱藥材蠶之利未廣俄羅斯及諸邊種人購絲於新疆不足仍議入蜀購絲臣通檄南北兩路局員檢校屬境桑株陸續稟報統計桑樹八十萬六千餘株教以飼蠶繅絲諸法兩年始有微效據各處呈驗新絲色潔質韌不減

川絲前飭總局採運委員胡光墉延訪德國開河鑿井織呢師匠帶購機器來蘭州入製造局教習西法並飭募雇湖州士民熟習蠶務者六十名交委員祝應巖山籍管領並帶桑秧蠶種及蠶具前來教民栽桑接枝壓條種植浴蠶飼蠶者繭繅絲織造諸法自安西州收煌哈密吐魯番庫車以至阿克蘇各設局授徒期廣浙利於新疆也所以先南路而後北路者以南疆生桑頗多一經移接便可飼蠶繅民勤習工作可收事半功倍之效由是推之西四城吏推之北路耕織相資民可使富即西北諸行國取攜亦便毋庸度隴趨蜀以買新絲遠商拜惠懷我好音彼獲其贏我亦得施其控制之術從此氛祲潛消亦未可知非僅蠶稅有增稍紓軍儲之急已也特事涉創行無速效可觀臣不敢多所論列惟有跼勉圖之仰副宵旰憂勤之意得 旨覽奏均悉所陳井井有條皆地方切要事務既已漸著成效即著認真經理以期次第就緒教養有資○李瀚章奏 臣於光緒六年正月三十日承准軍機大臣字寄正月二十二日奉 上諭據王大臣奏請籌餉節流等語查湖北控扼長江上游爲東南各省樞紐軍務肅清後裁撤征勦水陸各軍已及數萬其留防者 臣隨時量爲裁減均經奏明在案現在所留各軍僅有忠義八營升字三營武毅步隊五營馬隊二營水師僅有健捷新中等七營皆係擇要扼紮認真操練巡防地方賴以綏靖至省城原設各局如捐餉局崇文書局軍需局亦先後奏報裁撤誠以時勢艱難庫款支絀苟可節省無不

籌酌辦理其所留之善後報銷牙釐總查發審五局及營務處皆係因時制宜派員承辦各有專司並無
虛冒薪糧情弊茲蒙 聖訓周詳纖微必燭臣忝膺疆寄敢不力任嫌怨誠心經畫遵復督同司道通盤
籌議現在鄂省地方雖稱靜謐然地處衝要游勇會匪時虞四境旬結滋事亦須分紮防營俾資鎮攝就
目前情形而論水陸留防各營實有未可再撤者第值此度支竭蹶之時自應於無可裁減之中力求撙
節之法現在於陸軍忠義八營升字三營內抽裁勇夫三千零三名水師健捷新中健副三營內共抽裁
弁勇二百二十四名所裁各勇餉項截至三月底止另給一月口糧以作回籍川資並將黃州協操防官
兵全行裁撤每年可節省銀十一萬一千一百餘兩其前留各局如牙釐局爲通省釐金總匯所轄省外
局卡從前原有四百八十餘處自同治七年裁撤後僅存專局及分卡八十六處地皆扼要無可再減
後局本係軍需局歸併綜理餉情事最煩重營務處整飭防營總查局巡緝姦宄各有應辦實事均未便
輕議裁改惟報銷局事務較簡應與發審局一併裁撤嗣後報銷事宜歸併善後局兼辦發審案件概歸
臬司衙門辦理所留牙釐善後總查三局暨營務處及省外釐金局卡名雖仍舊其中大小委員薪水以
及局用一切現復逐加確核分別酌裁刪減每年可節省銀五萬兩營局兩項每年統共節省銀十六萬
兩零至漢鎮所設督銷局係歸兩淮主政應由兩江督臣酌核辦理下部知之○乙卯諭鄧慶麟奏各省

新科舉人赴學政衙門填寫親供書吏人等任意勒索請飭改為赴部填寫等語新科中式舉人例應赴學政衙門填寫親供至書吏人等勒索有干例禁自應嚴行禁止嗣後各省學政認真稽查倘該書吏等有藉端需索情弊即行從嚴懲辦並著將親供迅速送部毋稍遲延該御史所請改為赴部填寫之處著毋庸議○諭御史鄧慶麟奏在京當差喇嘛應領月糧請變通放給一摺著戶部議奏○追予貴州陣亡團練楊朝雋等祭葬世職○裕祿奏院省自同治七年擒逆蕩平後前撫臣英翰籌辦善後事宜以皖北鳳穎一帶風俗強悍蒙犯尤逞匪故巢必須重兵彈壓遇有宵小滋事隨時懲辦奏明酌留防勇分布鎮撫嗣以皖南招墾客民聚集日眾游匪混雜復有客匪闖汙潰滋事之案又經調派防軍扼紮廣建蕪湖一帶以資防範同治十三年因籌辦江防前督臣李宗義商調張得勝凱字一軍填紮江浦本省江防各營亦酌添新隊至是年冬間奴才接任撫篆時皖南北防軍馬步水師共計一萬八千餘人奴才接辦後於光緒元年督飭統將歸併零星淘汰疲弱將江防所添新隊陸續裁遣三千九百餘人復因防務一時萬難驟撤而經費支絀堪虞酌議分別裁留又續裁一千餘人並將軍需用款核實裁減原冀地方逐漸安謐防軍即可逐年遞減漸收節裕度支之效適值光緒二年江皖豫匪徒曠同等乘旱滋事又同時有邪匪分擾於大江南北而山東河南旋又相繼告災皖省切近災區巡防尤關緊要是以數年來樞衡

緩急未敢輕議續裁上年鄰省災荒稍定又值停止捐輸復遵部議裁去馬步勇丁一千餘人計已三次力加裁併七千餘人並將各營馬夫長夫等項均予裁汰勻顧餉需不敢稍遺餘力現計仍存馬勇七百名步勇八千三百餘名水勇二千一百餘名較諸初留勇隊之時已屬裁減及半皖省從前餉需除本省丁釐而外尚有捐輸及奏明提用漕折尤多鄰省協濟之款近年減折停撥捐輸截止協款亦均久停而歲撥各餉逐年較增出款則較前加至數倍非由此節年裁減不能勉力支持此歷年皖省防軍業經儘力裁併之實在情形也至皖省釐捐本係前督臣曾國藩及北路統兵大臣於克復地力後隨時設立不由皖省經理自同治六七兩年後始陸續撥歸皖省濟餉歷年來凡於設卡稍密之處皆已量加裁併光緒二年遵照部議規復鳳蕪兩關凡釐卡之在關稅地界者均行裁撤於裕課之中寓節費恤商之意計裁併後共存省城皖南北三局正卡十處分卡二十三處分巡三十七處誠以皖省濱臨江淮一帶港汊紛歧陸路又多岔徑所有扼要之處勢不能不有正卡巡卡以杜走私繞越而最難稽查者尤以陸路爲甚當釐卡改歸皖省之時亦曾籌及早路分巡之處過密原思將陸卡裁撤悉歸水路而歷年體查情形皖北一帶爲數省衝途路徑紛歧隨處可以繞漏旱卡所收之數較水卡所收之數並不甚相懸一經裁減不但收數頓絀而商人惟利是趨希圖免完釐金一切向由水路行走貨物大半亦繞由陸行水釐即

不免因之減色一線偶牽全盤俱動所以陸路各卡廣經歸併而未能盡裁者職此之故現值撥款竭蹶本省所恃以奉撥協餉供應軍需者全藉此爲挹注若再遞議裁除並無分項補苴之策恐立有餉需匱乏之虞此歷年皖省現存撥卡迭經籌議未敢輕裁之實在情形也此外如地方善後等項事宜有事屬繁難地方官未能兼顧猶任必須遴員專辦會辦者事時有皆由奴才暨司道等隨時酌核派委時日久暫不同事竣即飭回省其中如有必須酌給夫馬飯食紙張經費者皆由奴才等由外籌款酌量核給事極煩瑣並不敢動用正項其在省之發審交代等局則因省城時有京控提省發審要案各屬交代亦時有前後任欸目糾纏非提省督算不明之件事務殷煩固由藩臬總其大綱亦不能不有委員隨同分理以期迅速而免遲滯且刑錢兩端尤爲吏治之本原以候補府州縣各官將來皆有民社之責任該員等在省時於此要件相從經理既可以藉此練習吏事即奴才等亦可就此覘其才識以備選拔其事仍歸兩司暨安慶府署總理並不別立公所另外開支至於本省防軍辦理營務支應糧餉製造軍裝軍火修理器械採辦硝磺軍米以及追辦銷冊等事係在於省城壽州兩處設立軍需支應局經營其事所有應派各項委員均於隨營差遣文員內分別酌派該員役等應支鹽菜口糧等項皆係按照軍需則例支給隨同防軍口糧造冊咨部核銷歷年防軍遞經裁減委員一項亦經隨時裁汰現僅存文職四十五員

其隨營差遣武職人員則均係喬松年英韓行營所收投誠立功降旨及從征久戰將備當從前匪亂之際該員等或與地方結怨不敢仍回原籍或無家業可歸不能不自尋生計既恐其饑寒所迫游蕩生事又慮其報復相尋別釀弊端勢不能不收留在營資以養贖無事可藉以收束其身心有事尚可藉收爪牙之効用然歷年以來凡有出缺者卽予調除概不續補現計亦僅存四十六員此又歷年來辦理地方軍需酌用人員及武職隨營各員未能大加裁減之實在情形也現因時艱餉絀奉 諭旨飭將裁減各事實力奉行又奉每年在於丁釐項下加撥要餉十八萬兩自當督同藩司竭力籌解以顧要需查本省餉源素非充裕就目前之計非減裁防勇萬不能騰出鉅款而通盤籌度時事所值本省防務亦一時未可遽撤揅節要餉斷不敢因循塞責籌辦本省之藩籬亦不敢拘泥貽誤現就本省情形與河道等通籌熟計查現在存留各營分布於淮北豫省交界及皖南客民雜處之區地段綿長而本省之人在各路軍營當勇者猶復時招時散尙多遊手之徒未能悉安排鑒皖省及瀕江一帶客民叢雜會匪根株未盡加以皖省緊接江蘇上游江防一事所關尤重其留防離皖省者仍不敢不酌留不虞之備現於各軍所防地段勉爲裁併歸省撥於各營馬隊中酌留四百名歸併四起每起一百人俾資巡緝其餘二百八十名卽行奉撤又於各營步隊水師中擬裁去凱字專營勇丁一千六百三十二名以上兩項共裁減勇

丁一千九百一十二名所有營官哨長隊長等亦均隨勇一體裁撤以節餉需現留防於蒙亳潁亳等處者止馬步勇丁二千六百名留防於鳳壽滁泗等處者止馬步勇丁二千三百五十名留防於省城及皖南甯廣各屬者止馬步勇丁二千一百四十名其水師之在長淮沙溝等河者止存勇丁七百五名在巢湖者止存勇丁一百九十二名長江之支河汶港及皖南之內河諸湖並守護肅卡者止存勇丁一千二百六十七名爲數僅敷分布共計實留馬步水師勇丁九千二百五十四名其盤金各卡經費用項每月收數各有多寡之不同事務卽有煩簡之各異人數雖可定限制而收數不能拘以定額一切傾工火耗紙張筆墨雜費等項均視收數爲用度之多少故設卡之始係以每月收數定局卡開支成數按月核計均以一成開支就款開除不入收數是亦力求核實節省之意皖省接辦以來悉仍其舊現准部議飭將用款詳細核減開報奴才與藩司覆加籌議當時立法之始以收數爲開支之數原因各卡月收盤金多寡不同定爲隨時盈絀之法俾期時歸核實今若以每月無定之收數懸立一有定之用款是收數無定而用款轉屬有定收數較多之時尙無偏畸收數較少之時卽屬浮費揆之事理未免窒礙自不如照舊仍以收數核計而將支款普行裁節較爲公允妥實現就各卡所用人數多寡再加核減並查其事務繁簡詳爲衡酌飭將向來開支一成之數統減二分每收銀一兩定以開支銀八分以爲局卡委員扞手司

事書識丁役薪工及傾工火耗刊發盤票土價房租油燭紙墨等項之用其分巡各處卽附入附近正分各卡數內併算開支按通年收數開支止於八分總不及一成之數既無畸重畸輕之弊亦無收少用多之虞所有皖省三局正分各卡每月收數各若干坐支八分數目各若干應於半年彙報冊內詳細登明報部查核並將各卡減定辦事人數先行飭造清冊送部備查所減開支二分之數以近歲收數計之常年節省可在一萬兩上下至於地方事件本係隨時隨事辦理卽發審交代等事亦皆地方要務自可毋庸另議其承辦軍需等項委員現又逐細查核所有營務支應製造採買報銷各項事件再爲儘力裁併擬共留文員二十六員按照軍需則例應月支鹽糧等銀九百餘兩裁去十九員月可約省銀六百餘兩此外軍需項下例應勇丁雜支零款均按實用數目照例核算開支統於報銷內造冊咨部核銷其武職各員中則實因隨軍已久出力有年原係念其前勞藉資鈴束若驟予裁撤致令無業可歸情形既爲可憫亦恐無以勵後來將士之心惟有仰懇 天恩俯准留營効力暫免裁減例支鹽糧等項以示格外體恤嗣後遇有事故仍卽照前隨時調除不得再有續補以節糜費得 旨所有隨營差遣武職各員著准其留營効力該部知道○庚申 上詣 大高殿祈雨○吳元炳奏戶部奏捐兩淮票本一案欽奉 上諭既與改票初章不相刺謬且亦不致病商限兩箇月據實覆奏等因仰見 朝廷軫念離綱於裕餉之

中仍寓恤商之意各該商感沐 皇仁繫戀世業敢不殫竭血忱上佐公家之念 臣督同署運司徐文達
札調海州分司等集商妥議參考昔日之成規體察目前之岸務按年捐助商力實有未逮其中窒礙之
處有不能不於 君父之前親縷具陳者東南百貨經營以絲茶爲大宗近年動輒虧折惟兩淮鹽務歷
任督臣皆恪守曾國藩奏定新章行之近二十年獲利較有把握有票者恃循環爲恆業無票者欲攬入
而無從人情於難獲之事想望每覺甚奢輾轉喧傳票價遂無所底止致有淮票一張價值萬餘兩之說
細加推究前數年尙多更名之商近則價愈昂愈爲可居之奇貨非特無人願賣亦無人願買是票價之
昂已屬虛而非實自開按年捐銀之議本重利微勢所必至商情疑慮票價必落將所謂每票萬餘金者
恐漸至一文不值蓋鹽之利繁乎法鹽非法不能行法不善不能久也溯查道光末年票法之壞在跌價
搶售幾如風捲潮退而不可遏曾國藩有鑒前事之失在各岸設立督銷局整輪保價至今堅守不搖每
鹽一船到岸守輪至速亦須十個月或一年以上方能出售一遇滯銷則守輪或半年或兩年是其常事
數年以前鄰私暢行西楚之鹽竟有守至兩年半以上者雖往日倉租辛工湊耗在在加增而未有越輪
而售者良以暢年之有餘補滯年之不足通盤句計利雖薄而本不虧今各岸銷市暢滯靡常一旦賣以
常捐則一年擬捐千兩者守至兩年數已加倍萬一守愈久而捐愈重向之恃爲衣食之資者不且貽身

家之累乎議者謂淮南不費一錢而世擅其利與改票初章不符殊不知設局給票爲時甚暫同治五年間李鴻章署兩江督篆時請運已旺引票不能遍給遂商諸會國藩參綱法於票法之中刊頒淮南循環章程厥後馬新貽踵行於淮北彼時票價尙不甚昂新商往往往備本買票稟請更名十數年來始挾重資而來旋獲厚利而去者不乏其人目前辦理各商大率出過票本者居多與初行票時情形本不相同况南北捐輸不一而足自小選堡工需而山東而直隸而本省而閩省而山西河工災賑臣稽諸案卷共計捐過銀二百十三萬二千六百兩有奇或請獎或不請獎無非出自商資不僅修築清水潭一項人所共知其商情能如此踴躍者亦賴此循環之法有以鼓勵人心倘一朝墜此良法轉不足示大信議者又謂改驗資票爲商卽散新商自無不樂從殊不知驗資之法從前閩浙陸建瀛皆不得已而出此會國藩亦曾試行而軍興以後市情大非昔比一聞驗資之信知皆不惜重息多方告貸數月之間自上海以達漢口銀路頓然壅閉舉動數省幾至罷市而局卡所收之銀官庫長存之款亦不免私挪上兌甚至營弁洋商亦從而生心卒至得票者貪非已有挾資者簽票無名流弊不可窮詰會國藩始與李鴻章毅然變計夫豈無所見而改絃易轍哉矧新章之樂從以其有利也若散循環而按年再加以常捐是既奪其可操之券而又竭其不涸之源竊恐新商亦未必有人問津臣歷考淮南北報部課釐自新定章迄今已

逾五千萬兩以上循環章內載明犯規者扣除隨時另招補數則各商如有誤課誤運情事不難立時斥退利權仍操諸上非從前根窩盡由綱商把持可比為淮南圖經久之利在此為辦政籌不敝之規亦在此前督臣沈葆楨復奏江北引額礙難驟增摺內謂曾國藩每審定一法必歷數十年之利害如身入其中而歷試之洵非虛語竊思藏富於國不如藏富於商寬恤在一時正所以備緩急於異日謹仿歷次籌捐成案勸令南北及食岸各商湊集鉅資力保本業各該商不敢睨視縱北商力薄更甚於南而大義所在無不激發天良輸將恐後情願共捐一次銀一百萬兩先繳現銀四十萬兩其餘六十萬兩亦分岸定數由督銷各局按引核收隨時分批解部核與鹽務極盛之時綱商每過 國家大政報効鉅款情事亦復相同合無仰懇 天恩全數收勅部免其常年輪納各該商世受 國恩不敢仰邀 獎敘仍照章將所得引票永遠循環以裕餉需而保鹽局下戶部議奏○追予湖北陣亡提督石清吉於直隸本籍建祠○辛酉兩○予三品京堂銜修撰劉緯列入國史儒林傳○調邵亨豫為吏部左侍郎轉殷兆鏞為禮部左侍郎以祁世長為禮部右侍郎○壬戌 上詣 大高殿報謝○甲子諭岑毓英奏貴州在籍運同銜候選知縣詹懷清四川補用直隸州州同朱傳薪藉充義倉書院紳董勒折浮收侵蝕公款銀六千數百兩被紳民安永松等具控查訊屬實該員等恃符狡展不將公項繳還請革職嚴追等語詹懷清朱傳

辦均著先行革職嚴行追究以重公欵該部知道○左宗棠奏洮岷土司所屬番匪聚眾滋事官民團剿辦獲勝情形等已於四月初三日恭摺馳奏著隨州營遊擊提督陳再益三月十一日勦辦松坪股匪獲勝卽駐紮南峪寨十七日酉刻殺賊橋漢民飛報偵探知西岔堡匪二三千逼近殺賊橋攻大寨子燒燬房屋良民盼援陳再益潛師夜起十八日黎明抵殺賊橋官軍潛伏大寨子前後村莊團勇出莊搗賊匪眾見係團勇蜂擁向前迎拒陳再益揮隊猛撲立斃悍賊數十賊駭而奔追至冷水泉斬賊遂多日暮收隊是日同知蕭逢元率團勇攻燬峯崖賊莊亦有斬獲該匪四路紛竄十九日陳再益率兵圍分三路進攻西岔逆巢飭哨長遊擊昌恆盛等由小真莊遊擊李玉莖山東岔自率親兵向八稜寺進番匪憑險抗拒官軍以劈山礮測準轟擊拋擲火雷火箭紛如雨注匪勢不支棄巢紛向西岔陽山遁去昌恆盛隊伍甫至山麓過樹林中突出股匪數百卽奮威截殺斃匪甚多而李玉莖進勦東岔陰山亦獲勝仗合隊踏燬賊巢十餘處傍晚收隊洮岷協副將王仁和抵西固扼紮梁家壩地方探悉相距十五里之通花頭賊莊爲進兵要道三更出隊銜枚疾走二十日天明號鼓齊鳴賊惶懼失措斬賊十餘名墜崖落澗死者十數名餘賊潰遁二十二日王仁和陳再益會勦青山番匪兩路夾攻斃賊數二十四日陳再益襲據風回番莊夜半該匪一二千來撲官軍不動伺賊稍懈怠起乘之匪眾大潰追至大草坡斃

賊甚多風四里以南十數里賊屍枕藉提督張佑庭程文勝秦州營遊擊田連考各率所部步隊陸續抵階擇要駐紮二十二日提督張佑庭程文勝等分三路直搗山角賊坪巢二十三日出階州擊賊大真莊斬獲頗多田連考二十三日由階州進剿重山子賊巢攻克頭嶺二十四日攻克二嶺三嶺二十五日黎明匪眾蜂擁來撲田連考揮軍猛擊躡蹤窮追士氣彌奮賊無數官軍陣亡二名帶石傷者十有餘名此連日勦匪獲勝實在情形也番山重疊懸崖峭壁中羊腸一綫僅堪容趾官軍大隊能魚貫而不能雁行山徑如梭又須分支密布狃附而前始能深入其阻非俟所調各營到齊難敷布置臣等往復籌商此次造謠惑眾煽變首要各逆雖僅百旦巴等其巢穴則在瓜子溝而山後小徑與四川所屬章臘松潘驛相通本番眾聚居之所該番素以射獵爲生馬步趨捷甲於諸番若不乘此兵威速將瓜子溝巢穴搗平必貽後患而首逆百旦巴既有由階州西固入川之謠蓄謀已久雖階州西固可保無虞若賊由山後小徑冒險分竄川境誠恐滋蔓難圖除飛咨四川督臣丁寶楨嚴防外一面催飭所調各將領速會剿並飭該土司等挑派良番作爲鄉導轉相告誡冀良匪分明警威遠播而土屬各番自可相庇以安無虞他變矣據各營稟報連捷之後各番族見妖言並無靈驗去逆效順者頗多沈玉遂所派副將沈福田馬占龍等馬隊四旗已於三月二十六日先抵殺賊棚各營隊伍均可節次取齊臣等先出告示分別勦撫又

禁止濫殺辦理賑恤預爲善後之計務期就地妥速辦理就緒不令貽害他方得 旨卽著飭令各將領會同川省官軍實力搜捕毋留餘孽以靖地方○乙丑諭銘安玉跪奏職官畏罪潛逃請革職嚴拿等語吉林五品花翎記名騎校德懋勤賊不力追提省訊究復敢潛逃實屬目無法紀先行革職並著步軍統領衙門順天府五城一體嚴拿務獲究辦妥參領春壽糾捕尙屬認真著卽給還頂戴餘著照所議辦理該部知道○鄂純擬奏科甲爲掄才之薮州縣爲親民之官司馬辨材必須論秀君子學道乃能愛人古稱史治所以不曰能吏而曰循吏也 國家選補州縣於正途本屬優異自軍興以來歲時務者由武功得官擁厚資者因納粟入仕以致科甲州縣選補無期雖二三儒臣時有疎通正途之請而各班壅滯既未便於軍功一班沒其微勞亦未便於捐納一班阻其自効今捐例已停並 飭下京外大臣保薦人才天下士聞風稱忭感激馳驅此次會試大挑戰之卒未人數千百加多士氣奮興已可概見查進士卽用外補歸班內選近見御史李璫陳奏疏通欽奉 諭旨飭部議奏想部臣職司銓政必加意體恤量爲設法不使人才久滯惟此外尙有舉人進士或因場屋久困投筆從戎或念時事多艱指困助餉有以永無選期之舉人知縣而不得與挑者有以部曹實升不繼改就州縣而不得選補者此等人員既經學校栽培加以世情歷練同爲國家拔取之人更多體用宏通之士一經得有勞績或過入捐班部臣輒謂原

資已斷一體列入異途選補吏形遲滯若不與貢監出身之軍功捐納稍示區別似無以仰體朝廷疎
通正途之意查內選定例甲班舉班捐納各班內外升班各館議敘相關輪用軍功之過缺五缺分別插
用每輪口餘人之多五六年之久方得一週由甲班舉班得缺者均各不及二十人由軍功捐納得缺者
均各不止二十人擬請內選班次凡由進士舉人出身之過缺五缺及各班升班各館議敘均於各原班
中比較原資量為區別甲班舉班與貢監相關輪用則內選之甲班舉班較為推廣矣外補班次凡由進
士舉人出身保入軍功候補及歸入捐納試用者俱於各原班中比較原資量為區別以甲班舉班與貢
監相關輪用則外補之甲班舉班較為推廣矣查外補章程升調遺之缺即用候補與軍功候補相關輪
用大挑與議敘捐納相關輪用病故休之缺以即用候補軍功候補與大挑相關輪用參劾之缺專歸軍
功終養改教專歸即用亦為合例酌的本屬盡善各班均不偏枯惟原正途各班所以遲滯者緣省會要
缺府縣各督撫需用軍功捐納以致升遷調署異途捷足先登而正途少與焉夫以正途之惻惻無華其
趨踴應對誠不若異途之工一旦身膺民社凡所以培養民氣者必自讀書稽古中來雖其中迂疏寡效
學無根柢者亦不乏人古所謂拔十得五今未必不拔十得一也查省會府縣向章專用正途擬請嗣後
補署首縣省會一首縣者必實缺候補科甲不足十人方准於異途貢監酌用一人省會兩首縣者必實

缺候補科甲不足二十人方准於異途貢監酌用一人省會三首縣者必實缺候補科甲不足三十人方准於異途貢監酌用一人違則將各督撫議處至首府有表率之責職州縣尤爲緊要吏宜專用正途擬請嗣後補署首府必實缺候補之知府及同知直隸州得有升班者科甲不足五人方准於異途貢監酌用一人不得以正途各班非現居要缺卽人地未宜空冒塞實違則將各督撫議處則外補之正途府縣咸思自奮矣似此則正途漸多於民氣加意培養將見疆圉鞏固外侮不生際此時勢孔棘實有關於大局尤爲激勵人才澄清吏治起見請於正途州縣推廣疏通仍於選補班次毫無窒礙至省會府縣不過申明舊制專用正途以裨治理 上諭御史鄭繩祖奏正途州縣各班壅滯請量爲變通一摺著吏部議奏○諭御史鄧承修奏已革雲貴總督張凱嵩辜恩負咎忽蒙甄錄廷臣中必有妄加薦剡者請毋庸錄用以杜取巧並將原保之員照例議處等語前據侍郎殷兆鏞將張凱嵩保薦當以該革員曾屬疆寄雖經獲咎於前尚可棄瑕錄用是以諭令來京交吏部帶領引見查其才具是否可用再降諭旨自有權衡張凱嵩到京仍著吏部帶領引見該御史所請將原保之員照例議處著毋庸議嗣後中外大小臣工仍當秉公薦引各舉所知毋得徇私濫保用副朝廷延攬人才至意○直隸提督郭松林卒予祭葬建祠事續交國史館立傳○命湖南提督鮑超入覲○丙寅左宗棠奏臣於光緒四年十一月奏撥新疆情形一

摺以奉 諭有事關創始必須熟籌於事前乃可收效於日後刻下伊犁未經收還一切建置事宜尙難遽定其餘南北各城應如何經理之處卽著左宗棠悉心籌畫次第興辦總期先實後名俟諸事辦有眉目然後設分官職改設郡縣自可收一勞永逸之效所有辦理情形並著隨時詳細具奏嗣於五年九月續奉 諭旨新疆地方愚回錮習未除自應規畫久遠移其風俗俾就範圍該大臣所擬改設郡縣應如何辦理之處並著妥籌具奏欽此竊維新疆南路各城頻年辦理善後事宜均有端緒所有詳細情形業經會銜陳奏 上與楊昌濬再四諮度分設郡縣於時務相宜如蒙 恩旨諭允會同籌商辦理從此邊地腹地綢繆目張城郭廬帳羣萃州處彼此各仍其舊治外則軍府立而安壤有藉疆圉奠焉治內則吏事修而政教相承民行興焉上無鄙夷其民之心下有比戶可封之俗長治久安之效實基於此 臣兩次欽奉 諭旨恭錄咨行新疆在事諸 臣意見相合竊計改設郡縣經出經入費用較之從前部撥常年實數不但無增且可漸減誠及此時籌議興辦開設行省於 國計邊防不無裨補按新疆形勢所在北路則烏魯木齊南路則阿克蘇以其能控制全疆地居天山南北之脊居高臨下左右伸縮足以有爲也謹擬烏魯木齊爲新疆總督治所阿克蘇爲新疆巡撫治所彼此聲勢聯絡互相表裏足稱其形勢將軍索旗營駐伊犁塔爾巴哈臺改設都統並統練旗各營並擬增設伊犁兵備道一員塔爾巴哈臺擬增同知一

員以固邊防北路鎮迪道應仍其舊擬改迪化州直隸知州爲迪化府知府擬增置迪化縣知縣一員附郭州屬原設縣四一阜康一昌吉一綏來一奇台應仍其舊擬升呼圖壁巡檢爲圖壁縣知縣升濟木薩縣丞爲濟木縣知縣鎮西廳同知治巴里坤擬改爲鎮西州直隸州擬仍復原設宜禾縣知縣附郭哈密通判擬改爲直隸廳同知吐魯番境一名廣安州爲入南疆衝要首站擬增設廣安道一員以資控扼其吐魯番同知擬改爲廣安州直隸知州擬升關展巡檢爲關展縣知縣托克遜烏魯木齊通南八城衝要擬將地置托遜縣知縣一員以資聯絡南路擬設阿克蘇巡道一員喀什噶爾兵備道一員擬設知府四員一治阿克蘇一治庫車並隸阿克蘇巡道按阿克蘇卽古溫宿國擬設溫宿府知府一員溫宿縣知縣一員附郭擬設尹河縣知縣一員治尹河瓦提擬設拜城縣知縣一員治拜城均隸溫宿府知府管轄庫車卽古龜茲國擬設鳩茲府知府一員鳩茲縣知縣一員附郭擬設沙雅爾知縣一員治沙雅爾歸鳩茲府管轄喀什噶爾卽古疏勒國擬設疏勒府知府一員疏勒縣知縣一員治漢城疏附縣知縣一員治回城並附郭歸疏勒府知府管轄葉爾羌卽古莎車國擬設莎車府知府一員莎車縣知縣一員治漢城莎附縣知縣一員治回城並附郭歸莎車府知府管轄喀喇沙爾卽古焉耆國擬設焉耆直隸州知州一員治喀喇沙爾並設庫勒縣知縣治庫爾勒焉耆直隸州管轄和闐卽古于闐國擬設于闐直隸州知州

一員治和闐並設于闐縣知縣附郭歸于闐直隸州管轄烏什即白屬頭國擬設尉頭直隸同知一員治烏什英吉沙爾即古依而國擬設依而直隸同知一員治英吉沙爾凡茲所擬建擬大略雖經臣與新疆在事諸臣悉心商訂具有規模而地非親歷究難信之於心既擬置省分設郡縣則政務繁簡地畝肥瘠物產盈虛丁戶多寡差徭輕重為缺分苦樂所關非極其經出經入實數為之斟酌損益俾適於中則官困而民必受其病迺奏調浙江候補知府陳寶善到省督辦中令其熟悉新疆各局往復公署面為講求預將興革諸務以澈胸中飭三月下旬出關巡歷新疆察驗一切一面就近稟商各總統一面稟報聽候核示陳寶善久官牧令廉幹耐勞熟嫻吏事茲令參商建置興革事宜或有裨益至義塾市興學政及各府廳州縣校官應緩議設其丞倅佐雜應候分調郡縣後再分別陳奏請旨遵行新疆各員應否按照邊俸巡調升轉暫時亦可緩議至各城應安設驛站驛遞增設提鎮副將參遊都守千把外額大小武職及額兵俸廉餉乾本折均應俟新設督撫會同議擬具奏而藩臬大員均隨督撫駐紮庶總隨之司得所應承無事不舉凡此皆應由新疆督撫奏明次第興辦者非臣所得預議也如新疆置省分設郡縣仰荷諭旨允行應懇天恩先簡新疆總督新疆巡撫重以事權俾得隨時陳奏徑達宸聽其新疆軍務臣有督辦之責固不敢稍有諉謝也上諭左宗棠奏擬陳新疆宜開設行省請先簡督撫一摺

所擬建事宜頗爲詳悉惟現在伊犁尚未收復布置一切不無窒礙所有新疆善後諸務仍著該督因
地制宜次第籌辦原摺著暫留中再候諭旨將此由四百里諭令知之○丁卯恭錄奏烏魯木齊寧寧城
距迪化城十里同治三年九月迪化城失陷寧寧城堅守三月被逆攻墮迄今十六載奴才到任係借居
迪化城民房棲滿兵於城民堡嗣因災民陸續歸堡無可棲止復移滿兵於城內誠恐再經挪移別無寄
頓滿兵之處奴才迭次率同護協領連喜等往勘寧寧城城身大半傾壞城內一片瓦礫從前死屍骸骨
隨處掩瘞繁繁無隙地滿目荒涼於茲爲甚城垣周圍九里三分如果仍舊興修無論經費煩多力不能
逮卽以本處所遺兵丁合庫城古城吐魯番遷徙招徠料亦無多使之聚居城中實形曠廓不足以資捍
衛且遍地忠義骨殖不忍令其再殘於鋤鋟之下此寧寧城宜移建情形也當茲經費維艱似此零落滿
兵質難裔丁口不必急具專城然建一城以歸四城之兵卽節四城修費而爲一城之用事不宜緩亦費
勿虛糜兼之兵變後漢民亦形單弱若不使滿漢聯爲唇齒善後未足自強奴才查迪化城東北兩門逼
近高原俯視城中虛實畢見設或再有邊警高原不守難固城防爰訪地師相宅高原得地四里三分氣
脈較旺土水色味亦正既詢謀僉同更卜云其吉高原以處滿兵則所以捍迪城而衛百姓也又況壤接
伊犁精河邊界逆騎飄忽靡常隨在間道通烏烏城係全疆扼要重鎮軍情喫重又與前敵無殊則城工

經始尤望其併力速成現當經費支絀力求撙節約略估計先需銀四萬乘此青黃不接之時除民力屯
墾外藉可以工代賑擇於本月初九日開工並分飭大小員弁實心任事勵眾志以成此城既非尋常修
城可比尤宜異常出力經營統俟急工迅竣請繪圖貼說恭呈 御覽下部知之○是月日斯巴尼亞國
使臣伊巴里回任

臣朱壽朋敬編

臣章上琛校

五月己巳 上詣 大高殿祈雨○李鴻章奏戶部咨開具奏籌備餉需一摺欽奉 上諭一道鈔摺恭

錄到直遵卽督飭司道悉心妥籌茲據詳覆前來查戶部原奏十條除停止工程核實折價扣收兩淮票本三條應專歸戶部及兩江辦理外其餘各省核辦者七條內嚴催墾荒一條查直隸內地並無荒田間有旗民無糧地畝或山隅河灘堪種之處均飭隨時認真勘辦惟地土瘠薄災歉頻仍徵收不能足額尙無以熟報荒州縣隱匿紳富把持情弊其西北口外各旗官荒馬廠從前章程不一非專歸地方官經理現已奏派道員前往查辦自可逐漸升科無庸另議又溢解關稅一條查天津未設新關以前凡內河外海陸路商販貨物皆歸鈔關完納常稅爲數頗多自各口通商火輪夾板駛行便捷常稅大形減色此中外所共知者近年直省豫頻遭災歉貨物滯銷收數較往屆幾減三分之二此又時事不同初未計及者北地貨稅遠遜東南洋海關局面本不如閩粵等關之寬博目前情形如此將來能否暢旺尙難逆料惟有俟關期報滿如有羨餘卽令溢解其北洋統轄之山海關情形相同應一律辦理東海關尙未查

覆另行核辦又整頓盤金一條查天津於同治初年創設百貨盤捐每年收銀不過二萬兩經臣改革整頓每年可收至六萬餘兩撥濟海口礮臺等項要用其局用所費統計不及部定一成之數尙爲撙節所有歷年收支各款業經分晰奏咨此外惟有大名寧河各有抽收貨盤該兩處商貨甚少每年只解銀數千兩歷係彙入保定天津練軍正餉開支列報大名則令該府同知等兼管寧河則令該縣稽徵初未專設一局臣迭加考察皆係涓滴歸公並無冗員濫役零星分卡蓋與東南各省貨充盤旺散布局卡者迥不相同也至津海山海等關洋藥盤捐向照定章按斤抽收充餉另抽羨盤作爲局費津海關以半年一次開冊報部山海關以一年一次開冊報部應仍照章辦理又嚴查交代一條查直隸州縣前因地方多故或未依限結報或算結而交項未清相率宕延殊屬不成事體上年督飭藩司任道鎔嚴加整頓議定章程自光緒六年正月起無論升調及有事故一經交卸卽責成該管府廳州將該員扣留會算依限結報所欠交項飭令完清其六年以前交代未結者勒限算結已結而有欠款者一併追完逾限不結不完照例參辦該司嚴提勸欠力杜新虧現已辦有就緒至交代未清各員應仍扣補扣委各節亦與部章相同無庸另議又嚴核奏銷一條查直隸奏銷以地丁旗租爲大宗其餘雜項皆關庫款自應依限辦理藩司任道鎔飭令各屬將每年應徵額款及現時徵解支存民欠各數按月造具四柱清冊呈送考核卽爲

奏銷根據凡有徵存銀兩儘數提解不容絲毫虧挪仍飭該司俟奏銷時核明已未完分數員名開單詳
奏其長蘆鹽課等項奏銷並飭運司仿照辦理又催提減成養廉減平銀兩兩條除長蘆運司津海鈔關
減平銀兩向係按年解清毋庸再議外查藩庫應放養廉及一切支款每年可扣減成銀三萬餘兩減平
銀四萬餘兩惟地方著名瘠苦並無額外可籌之款可興之利歲收糧租等項向不敷出是以嘉道以前
每年須有部撥銀二三十萬兩藉資接濟咸豐以後協款停止且須由直協濟新糧及東三省餉項又撥
永定南北運各河每歲搶修經費順天府採辦備價東西陵添設官兵俸餉雜支每年共添支銀二三
十萬兩其隨時添撥者如萬年吉地惠陵樹價及前數年迭辦大差橋道等項經費動需鉅款尙不
在內又值災歉頻仍每年調緩糧租不下三四十萬兩進款愈少出款愈多遂致羅掘一空歷年減成減
平銀兩均隨時挪墊支發並無絲毫存庫實戰雲甘肅支絀情形尤甚今部中反不能如前協濟而外
撥之款又難減裁若再將減成減平銀兩悉索無餘必更動形棘手畿疆重地庫儲斷不宜過空應請照
留支省分辦理免其提解俾資周轉臣仍當督飭司道於應徵賦課釐稅各項認真整頓悉力經營杜暗
耗之弊踴躍當務之實事以裨庫款而濟時艱下戶部知之○庚午莫勒赫額奏八旗兵丁生計艱難久
已上勞宸念至兵丁白事曾因庫款支絀停放白事銀兩乃停放未久仰蒙 賞給五成則白事喪葬

有資不至無所措手奈兵丁貧苦者多當其家有事之時每值旗庫無銀之日則愁急交迫甘苦重利指此銀而求借者有矣甚至求借不得冬夏嚴寒盛暑數日不能煖者有矣惟正白旗滿洲辦法最善前任印務參領愷齡多方撙節設措得數百兩公款稟明和碩恭親王將銀存在旗庫兵丁一有白事即時呈報該管佐領佐領出具圖片即時報至該管參領由旗庫即時按其應得之數封出八成銀交該騎校族長等帶銀前往查驗訖將此銀借給有事之家俟下次由戶部領銀到旗扣歸所借八成補放所有二成既無虧於公款尤有濟於兵丁迄今行之有年人皆稱便伏思八旗兵丁世受國家養養栽培無不周至再將此項 恩賞白事銀兩均能仿照正白旗滿洲辦法則自無緩不濟急之憂然各旗雖欲照此辦理恐無款項可籌惟有仰懇 天恩飭下戶部籌議先將此款放出一次俾各旗庫皆有存銀一遇兵丁報事隨即借給八成下次如數扣還似此周轉通融未可謂非救急之一策 上諭御史莫勒展額奏恩賞八旗兵丁白事銀兩請飭撥款以備支放一摺著戶部議奏○辛未頒給陝西甘泉縣 風神 雷神 龍王 城隍廟匾額○九年明堪奏於湖南省城建立楚軍水陸昭忠祠○予湖南湘陰縣貢女周源貞旌表○壬申春福那遜綽克圖杜嘎爾奏烏里雅蘇臺自同治九年猝遭兵燹之後節經前任將軍大臣等以戍守官兵度日維艱奏請擬照新疆之例酌增鹽菜銀兩俾資餬口等因奏奉 諭旨允准欽

邊辦理在案嗣准部咨關外現在肅清所有烏城從前添練官弁酌加鹽菜一律裁撤以復舊制而節經費等因行知到烏奴才等自應遵照辦理惟查西疆自用兵以來各城被賊滋擾蹂躪幾遍現在雖有克復之處辦理撫局一切事宜在在需員況渠魁尚未伏誅餘匪仍復出沒警報時聞巡防偵探夙夜難懈刻下兼籌設辦邊防差操更爲紛繁且烏城爲西北門戶各城糧餉出入接護尤關緊要奴才春福於四年四月抵任後查看烏城大寒地瘠出產毫無兼之餉項不繼該官兵以及差委暫留員弁等異常苦累猶能辦理一切公務奮勉當差辛勤晝夜毫無貽誤其官弁日用等一切均係內地等商人運道販運值此糧餉支絀多有裹足不前至於白色貨物較前價增倍徙不止該官弁兵丁每銀一兩購物較內地不足五錢諸凡困憊不堪言狀若不量爲體恤實有枵腹之虞奴才等受 恩深重具有人良當此帑項支絀之際但有可以省儉無不設法力求撙節爲敢再事瀝陳奈目覩該官兵差委人員實在窘迫情形籌思再四不得不據實直陳懇 恩俯念該官兵等遠戍邊防不敷餉口加添鹽菜銀兩俾得接放以示優恤而資養贍如蒙 俞允該官兵差委人等得能果腹當差自必益加奮勉下戶部議奏○癸酉張樹聲奏調編修李用清徐州道段赴赴廣東差委允之○甲戌兩○諭雲南普洱鎮總兵左啟龍永昌府知府周慶椿臨安府知府許廷桂著劉長佑杜瑞聯悉心察看如竟不能勝任卽行據實奏參○丁丑 上詣

大高殿報謝○前陝甘總督布彥泰卒予祭葬○賜黃思永等三百十三人進士及第出身有差○己卯王炳奏歸班進士知縣向無分發十餘年尙難望選光緒二年閏五月前御史劉錫金奏請量予分發經吏部議覆准其分發試用一年期滿於升調所遺之選缺俟捐納用過之後補用一人惟升滿缺出甚少到班極爲遲滯況又有由部員奏改者該員等既無力在部供職從事於外仍復序補無期殊可憫也查此項人員雖非卽用究係進士出身自應優於捐納各項相應請 旨飭部將歸班進士分發人員到省期滿後再於病故休三項缺出俟大挑用後插補一人仍用本班先一人此外另有五項遺缺及各項要缺仍不得請補則於疏通之中仍寓限制之意於吏部銓補全無遲礙查外補班次惟候補班與卽用正班相間輪用班次最優而近年各省候補班多係軍營濫保捷足先登迺歸班進士讀書數十年反不得與之相比實爲向隅特甚現在既經停捐極力請求吏治之時吏宜疏通正途以挽積習 上諭御史王炳奏歸班進士分發人員補缺遲滯請飭酌量疏通等語著吏部議奏○諭前據御史鄧承修奏參廣東學政吳寶恩考試草率各節當經諭令劉坤一裕寬確查具奏茲據裕寬奏稱查明該前學政被參考試草率倍索供應棚規及關節賄賂勒罰銀兩等款或無其事或係傳聞之誤均毋庸議惟於嘉應州民間私建祠宇供設已故地方官牌位與甯縣案首范彬等捐銀修理該前學政既知其父吳斯樹牌位

添祀祠內不行阻止輒復前往行禮殊屬不合吳寶鋆著交部議處前署嘉應州知州候補知府嚴家疇
奉查事件並不明白稟復雖非有心隱飾究屬疎忽著一併交部議處○庚辰已革雲貴總督張凱嵩命
以五品京堂候補○辛巳大祀 地於 方澤○癸未頒給甘肅寧夏滿城 關帝廟匾額○甲申諭軍
機大臣等有人片奏平定州孔廣培有使吞倉穀情弊又平定孟縣樂平鄉等處皆有積壓膠黃之事請
平縣陳令審案誣枉請飭嚴查等語著會同查明具奏原片鈔給閱看將此諭令知之○乙酉諭溥琳
等奏特參任性妄為之防禦請予革職一摺防禦書紳素不安分於住班期內私自回營適遇護國公奎
瑛家人松海在營房街內走將馬其捆打扣留形同無賴書紳著即行革職總管慶秀翼長培碧英瑞末
能在營彈壓事後又不立行呈辦實屬不合均著交部照例議處奉恩護國公奎瑛雖無迴護家人情事
究屬未能約束著交宗人府察議○丙戌大學士載齡以病乞休不允○諭軍機大臣等會紀澤前因崇
厚出使俄國違訓越權所議條約諸多窒礙經廷臣會議罪名定以斬監候實屬罪有應得乃近聞外間
議論頗以中國將崇厚問罪有關俄國顏面此則大非朝廷本意中國與俄國和好二百餘年實願始終
不渝無失友邦之誼崇厚奉命出使於中國必不可行之事並不向俄國詳切言明含糊定議罪由自取
朝廷按律懲辦以中國之法治中國之臣本與俄國不相干涉第恐違道傳聞於中國辦理此案緣由未

能深悉或因誤會而啟嫌疑未免有妨睦誼茲特法外施恩將崇厚暫免斬監候罪名仍行監禁俟會紀
澤到俄國後辦理情形若何再降諭旨會紀澤接到此旨著卽將崇厚暫免斬罪知照俄國並告以中國
與俄國和好之據卽此可見其應議條約著仍遵前旨妥慎辦理將此密諭知之○左宗棠等奏洮岷土
司所屬瓜子溝番匪首旦巴聚眾滋事及官軍剿迭次剿辦獲勝緣山經剿等於四月初三十八等日
其奏並奏到 上諭左宗棠等奏番匪滋事兵圍剿辦獲勝現籌辦理情形一摺著因欽此當卽恭錄轉
行欽遵辦理伏查此次番匪滋事變起倉猝以旦巴爲禍首以瓜子溝爲老巢自經督軍迭次擊敗後
該匪兇鋒頓挫不敢遠離巢穴惟是裹脅既多首逆詭謀未已猝難解散兼番地山深箐密路徑猷仄有
險可恃必須先將外面從速肅清次第平定然後可達瓜子溝四月初八洮岷協副將王仁和副將馬占
榮沈福田土司楊作霖各率馬步分三路攻上驢駝下驢駝各莊楊作霖率番兵歷往山梁要路嚴礮爲
號各營勇勇冒矢石一鼓並進攻破卡隘追殺數里奪獲軍器一百餘件斃賊五十餘名生擒八名而利
族公廝鐵場等番繳械投誠者三十餘莊風聞立子莊之上而大草坡賊扎木壘二座糾集下猴子等處
番眾蜂屯二壘前後左右經官左旗陳再益虎威營田連芳左路後營李志剛等亦於初八日分三路進
攻火箭噴筒齊發士卒奮勇而登立破兩壘殺賊六十餘名擒斬九名墜崖死者無數奪獲旗幟五十餘

件師抵下猴子莊該匪糾眾迎敵各營會合奮擊直從山梁墜下連奪兩卡破賊巢三處追殺三十餘名擒斬四名其餘番畏威乞撫於是上猴子下猴子上達凹下達凹等十餘莊亦相率呈繳軍械望風歸附計兩處之戰官軍陣亡八名受傷二十餘名此初八日分路進攻上下驪駐大草坡下猴子莊獲勝並收降各莊番之實在情形也初九初十一等日楊作霖及團練擒獻小番目十名均解階州訊辦王仁和於初十日選勇十名派楊作霖眼線馬希麟帶番兵鎗手五十名降番二十名受以機宜潛伏瓜子溝要道十一日黎明該降番襲奪百旦巴之子急奔以出卽上平地震時所生僞構活佛者也該匪驚覺來追伏兵齊起鎗斃數賊賊乃卻百旦巴黨與聞活佛既失解散頗多十六日沈玉遂約陳再益田連考李志剛等率隊由三洞溝進王仁和馬占盈沈福田率馬步隊由鐵嘴進自率前右兩營由瓜子溝口進賊於溝口設卡滾石亂擲師不能前各勇用劈山礮轟擊賊始棄卡竄入老林山頂曉以利害衆旋來降開造戶口計男婦二百餘人點名查驗內有逆兄屈五逆叔那勒喜逆弟增周及侍奉僞活佛之和尙老核四犯擬與僞活佛一併解省審辦十八日瓜子溝之東南卜爾河洋湯等莊番目悉來領良民白旗乞撫自此黑番四旗一律歸順惟百旦巴先已潛逃比經分飭各軍赴山搜索未獲二十日前署蘭州道劉珣抵瓜子溝與沈玉遂會商一面招集逃番諭令捕賊贖愆並予重賞去後二十三日卽據繳獻助賊之納麻

點周雙劍二犯訊悉百旦巴與分逃不久當令該番根協仁武等跟蹤追捕適陳再益亦派兵丁李倉等
搜緝遂於二十四日旁晚在離瓜子溝六十里之粗武扎罕山巖擒獲首逆百旦巴及其婦羊子滿並落
帶山首匪五斤半同日拿獲到營訊知百旦巴的名勾羊任節百旦巴者算掛番語也據龍錫慶沈玉遂
劉琰等先後稟報前來臣等查番地自上年地震之後繼以水災情形本屬困苦今復遭百旦巴之亂荷
漢人民轉徙流離尤堪憐憫幸仰仗 皇威迅就撲滅且分別良莠剿撫兼施俾蚩蚩愚氓不致同罹浩
劫今巢穴已平罪人斯得應將兵勇次第撤退俾逃難男婦及早復業此時春耕已過亟須籌辦賑濟一
面酌給籽種趕種雜糧庶秋收有望現檄飭沈玉遂王仁和田連考等各率所部先行回防並裁撤階文
西圖新招土勇以節經費撫綏善後事宜責令劉琰會同龍錫慶妥為籌辦臣昌溶已兩次委解賑捐銀
一萬兩可資接濟仍酌留張佑廷陳再益等數營旗分扎公塘黃土壩一帶暫資鎮壓用廣 皇仁而安
反側除批飭先提古旦巴五斤半納麻點周雙劍四犯於訊明後卽行就地正法並將百旦巴五斤半梟
首示眾其餘所獲各犯容俟訊明分別辦理此次在事出力員弁兵勇迅赴戎機晝夜冒雨馳援不避艱
險各莊番漢良民團練助戰亦能深明大義現首逆悉數擒獲辦理尙臻妥速不無微勞可錄仰懇 天
恩准由臣等擇尤請獎用示鼓勵其陣亡弁勇容俟查明彙案請 卹 上諭左宗棠楊昌溶奏官軍剿

辦番匪擒獲首逆全境肅清一摺甘肅階州瓜子溝番匪百巴於上年五月間生子適值地震之時詭
稱伊子爲活佛煽惑番民脅令各番族嘯聚爲亂本年三月間膽敢糾眾攻破西固州同所轄民堡滋擾
地方經左宗棠等派總兵沈玉遂道員劉璣等會同剿辦迭次擊敗將瓜子溝逆眾攻克陣斬匪類多名
旋獲首犯百巴卽勾羊任節等訊明正法並將逆子拿獲地方一律肅清辦理尙爲妥速仍著左宗棠
楊昌濬督飭文武將撫綏善後事宜妥爲經理以靖邊疆所有在事出力各員并准其擇尤保獎毋許冒
濫陣亡弁勇並著查明請卹○予江蘇山陽縣節婦鮑王氏旌表○岐元等奏前准戶部奏籌備餉需一
摺等因欽此欽遵咨照前來查部議章程十條其停止不急工程核實顏緞兩庫折價兩條係飭由該部
籌辦捐收票本一條係指兩淮而言其餘七條有應奉省分別核辦之處如原奏嚴催各省墾荒一條查
奉省十六邊門內地除大凌河之馬場係爲游牧之所此外非旗卽民盡屬升科地畝並無大段閒荒可
以招墾聞有首報河淤及地邊滋生隨即札飭查丈升科至流民私墾圍場業蒙 恩准升科清丈撥領
擬設總管通判以資治理應禁之園亦經劃清界址設卡嚴防惟東邊外新設四縣如有續墾自當一律
升科俾無曠土又原奏通核關稅銀兩一條查奉錦山海關道設有常洋兩關洋稅係稅務司專管另有
冊報常稅已有新增盈餘自難再籌溢解該關報銷向歸北洋大臣經理應由直隸總督核辦又原奏整

頓各項贖金一條查奏省內外城有糧食等捐現飭民地方官隨時督飭照依奏准章程實力稽徵法庫威遠彰武三邊門及該邊門分口原有車捐立冬車路暢行添派委員抽收至次年清明裁撤向係儘徵儘解專案報部抵充俸餉又有鹽釐貨釐兩宗專充練兵餉需員釐賣成山海關道於營口設局經徵鹽釐則沿海各灘零星間隔東西袤延千有餘里僅設十數處分局就灘抽收時虞照料難周若議裁減則偷漏走私收數必形短絀至支用經費皆係核實開銷奏報有案亦屬無可核減又原奏嚴查州縣交代一條查奉省交代前因積壓較多設局清釐酌定章程自同治三年清查後至光緒二年底止作為舊案交代光緒三年正月以後作為新案交代劃清界限將無虧各案造具冊結變通報部虧項較多者另摺奏參欠數較少離省事故各員勒限咨追此外有應議應查各款統限半年結報免扣例限寬免從前處分業經奏明由部議准現在遵照分別造冊勒限自可毋庸再定章程至委署州縣任卸日期向係按月按季咨報吏部現應遵照部議分報戶部以資考核又原奏嚴核各項奏銷一條查奉省地丁奏銷例限次年五月題報歷年均依限報銷並未遲延部議先將未完一分以上各員名開具清單專摺奏報由部核定處分先行覆奏等因係為嚴定處分起見惟奉省奏銷均係具題若再專摺奏參不特題奏重複且續有微案各員紛紛具奏亦涉煩瑣擬請嗣後如實係分數較多有關革職降調處分者另摺奏參如

僅止降留俸處分仍照舊章依限題報毋庸另行具奏以歸簡易至內外城旗界應徵餘租升科低田試行續墾各項地畝錢糧均係年清年款惟義州廣寧兩原牛莊遼陽數城尚有舊年積欠未清現已嚴飭勒追此後新徵照依考成定限全完若有未完一分以上者卽照新章辦理又原奏專提減成養廉一條查奉省自變通吏治將軍府尹府丞驛巡道東邊道昌圖府興京鳳凰同知懷德奉化通化懷仁安東寬甸六縣養廉前經奏奉 諭旨均按實銀給發其餘各州縣養廉銀兩向係扣除停止成數按銀數折算由稅款及地丁耗羨項下撥領歷年造冊報銷所扣減成銀兩隨同地丁批解盛京戶部並盛京戶部扣成文武各官減成養廉向章按年歸入平餘摺內奏明搭放本省俸餉專案咨報並造入銀庫奏銷冊內報部查核此項減成養廉銀兩爲數無多應請仍照向章辦理毋庸批解京部以免周折又原奏催提減平銀兩一條查奉天府屬扣成減平銀兩亦隨地丁統解盛京戶部並盛京戶部發放雜支等款核扣減平銀兩向章按年亦歸平餘摺內奏明搭放奉省俸餉專案咨報並造入銀庫專銷冊內報部查核此項減平銀兩亦屬無幾並請免解京部下戶部知之○辛卯清安桂祥奏科布多額設章京四缺糧餉處承辦章京一缺由吏部於各衙門筆帖式內帶領引 見派往作爲委署主事三年期滿奏請更換印務處承辦章京一缺幫辦章京一缺辦理蒙古事務處承辦章京一缺每遇缺出均由本城筆帖式內揀

選奏請 賞加主事職銜作為承辦章京七年期滿照例更換如願入京城部院當差者以主事候補願改武職者回綏遠城以防禦候補筆帖式三缺五年期滿如願入京城部院當差者以筆帖式候補願改武職者回綏遠城以驍騎校候補又候補筆帖式三缺向由換防委筆帖式內選補此科城原設之缺額也奴才等查科城軍務較繁原設三衙門章京等缺為數過少遇有差委實屬不敷分派奴才等商酌擬請糧餉處添設幫辦章京一缺筆帖式一缺候補筆帖式一缺印務處加添筆帖式一缺候補筆帖式一缺辦理蒙古事務處加添章京一缺候補筆帖式一缺以資辦公下部議奏○壬辰直隸按察使丁壽昌卒予祭葬建祠政績戰績交國史館立傳○以方大湜為直隸按察使○乙未李明墀奏准戶部咨開具奏籌備餉需一摺著各督撫於奉到此旨後督率藩司等悉心經畫等因欽此伏讀戶部贖陳十條停止工程據實折價原奏聲明由部分別核辦又捐收兩淮票本應由兩江督臣酌核定則奏報外如原奏嚴催各省墾荒一條查現在荒蕪田地自以江浙等省為多湖南各屬地狹人稠山陬海澨均已開闢無遺竊維未墾荒土上年十月戶部議覆翰林院侍讀王先謙條陳咨行查辦當經由司詳經咨覆在案所有湖南額徵地丁等款正耗銀一百二十五萬餘兩除每年災緩銀二三萬兩及四五萬不等餘皆按額徵解實因湘陰寶鄉等縣濱湖田畝形勢低窪為頃年積淹之區勢不能不將應完錢糧酌請調緩每據各

屬東報均係移行該管道府核實覆勘詳辦尙無藉口偏災以熟作荒情弊又原奏通核關稅一條查湖南無通商口岸並未設有洋關亦無著名常關祇有辰州府設一木關每屆額徵木稅正盈銀二萬四千六百餘兩竹稅銀一千八百餘兩鹽稅銀三千二百餘兩歷由該府經徵近來從未收解足額每年尙須賠繳銀數千兩又寶慶府關額徵商稅銀三千七百餘兩爲數無多每年亦僅能照額徵解緣寶慶一線灘河行商稀少而辰關則專徵貢州下游竹木邇來來路不旺稅銀因之不能足額此與他處關稅情形實有不同又原奏整頓釐金一條查湖南釐金從前原定章程頗爲周備是以行之多年尙少侵蝕挪移等弊近因子口稅單盛行稅數遞行短絀屢經確查委非承辦員紳營私舞弊卽洋藥釐金亦係照章按斤抽收並無以重作輕暗中虧折情事至局用一項昨已遵奉諭旨將員紳書役薪糧分別刪減詳明奏報在案統計所用以上年收數而論尙不及一成之數第局中之支用有常而釐收之多少難定恐難畫一定議惟有督飭各局卡員紳加意稽查儘收儘解實用實銷仍遵照部議將貨釐藥釐鹽釐分晰開報以免牽混又原奏嚴查交代一條查湖南各州縣交代久經詳明定章凡有交卸人員必須後任出結方許回省稟到交代未清實缺不准到任候補不再委署並不准派委各項差使現奉戶部奏定章程皆該藩司等平日兢兢講求不敢稍踰尺寸者嗣後仍當恪遵交代例限勒令迅速結報如有任意虧挪延

完不結卽行據實揭參以重帑項而免效尤又原奏嚴核奏銷一條查湖南各屬錢糧向係分別上下兩忙勒限派數提解邇來年穀順成徵解頗形踴躍統計通省地丁上忙徵解總在三成以上截至年底徵解下忙總在五成以上歷年詳經奏咨有案每屆奏銷期限間有欠完一二分以上者亦經按年詳請題參茲奉戶部定章錢糧奏銷一面具題一面將未完各職名開單專摺奏報由部核定處分先行覆奏自應自本年造辦奏銷爲始將經徵丁漕各款未完一分以上各員職名開單詳奏業由該司道通飭所屬迅將未完上屆錢糧趕緊掃數徵解自顧考成又原奏專提減成養廉一條查文職養廉分別按品核減湖南自奉新章以後均照減成支放惟並未將減成銀兩另款提存蓋緣文員廉銀例由耗羨項下勸支湖南耗羨只有一十一萬餘兩而廉銀額支一十三萬餘兩不敷之數歷將扣存空半並動存留備湊支均經造冊奏銷有案擬請仍循舊案辦理惟巡撫暨學政養廉向歸鹽庫匣費內支解嗣因兩淮匣費無項解湘咨准部議每年提撥川粵鹽釐銀二萬兩解道供支亦照減成支送總計每年除應支養廉公費及書役紙張飯食外餘銀二千三百餘兩歷係解歸督後局奏充軍餉又武職三品以上核減一成養廉每年應扣銀二千三百餘兩雖光緒六年春季爲始將武職減成廉銀專款存儲司道庫鹽釐支剩銀兩一併按年撥解部庫交收又原奏僅提減平一條查湖南藩庫應解減平前奉戶部催提已將扣出銀

兩葉同糧鹽道庫應扣減平按年搭解赴部在案總計司庫支發各款每年約扣減平銀一萬五六千兩從前扣存之項多因軍需動用一時驟難提還應請嗣後仍儘司庫支款扣出減平同糧鹽道庫應扣銀兩一併按年搭解藉充餉需下部知之○是月法蘭西國新簡駐華使臣寶海抵任

六月戊戌何璟等奏光緒六年二月十二日准部咨奉 上諭戶部奏籌備餉需一摺著將如何辦理情形趕緊籌定議限兩箇月據實覆奏不准稍有延宕等因欽此○等伏思今日財用之匱乏甚矣民生之凋敝極矣故理財者別無生之一法祇有節之一途部章規復本有之財源甚減可緩之用款實爲洞中窺要惟所奏十事有非外省所應核辦者有非各處所能盡同者謹就閩省現在情形爲我 皇太后

皇上縷晰陳之一壘荒查閩省負山面海土瘠民貧植茶抽漁者半服田力穡者亦半從前兵燹之後四境間有荒田年來率已回復其別有兩壘者僅係栽種雜糧之零星僻壤鮮有大段報升亦無以熟爲荒之處惟地丁一欸溯查道光年間每歲尚完八分有奇厥後車輿減色約輸六七分不等近年設法整頓完數幾及八分與前相去無多○等明查暗訪並非地荒不治亦非州縣苛徵實由小民生計拮据以致催科未能足數現飭各屬多方諷諭俾期逐漸擴充悉復應完舊額一各以釐金查閩省抽收員釐向從起運之區至銷賣之地經過局卡分起報完釐票由省刊頒票根隨時繳驗並在各府設立總局督徵

彙報而省局又不時派員微服密查懲其含糊獎其勸誦實已層層鈐束其勢不能欺隱至於洋藥盤金係照實在斤重收完並無將貨減折滋弊閩鹽自同治四年改行票運始有鹽盤其款隨同課耗並徵而商情疲憊微解爲難雖經按屆湊足造報均係勉力籌維實徵實解亦無弊混惟陸則山徑叢雜水則港汊紛歧商販趨利若鶩類多闖越偷漏非船卡不足以分扼非哨勇不足以緝私而地廣人稠所需數鉅現今量爲裁併期於無濫無冗總儘盤餘動支毋或虧挪止項一州縣交代查交代例有定期原不容相爲積壓閩省各屬之所以未能早結者或因墊辦軍需續經刪減或辦理地方公事賠累滋多輾轉糾纏非今日始節經費限飭催並先後奏參有案現據光緒五年以前未結交代作爲舊案辦理認真勒限催提隨算隨結實短實參其六年起新案交代亦飭依限結報再有延誤卽照部章實缺人員不准到任調署候補人員不准委署他缺並停派各項差使仍予查參追辦一各項奏銷查閩省奏銷以地丁爲大宗耗羨糧米米耗等項附之鹽課係自爲奏銷而鹽折附之地丁鹽課奏銷二案歷辦並無違誤除鹽課照額全完外其地丁鹽折未完職名向於奏銷考成冊內造報並另造簡明清冊送部現催各屬依限趕辦屆時先將未完一分以上各員職名開單奏報以昭慎重一減廉減平查咸豐三年起文武各官減成養廉並道光二十三年以後減平銀兩原應解部充餉惟閩省庫藏奇絀悉已借墊軍需並辦盤防助用無

存現奉 諭旨辦理海防一切修建礮臺操演兵輪購置礮軍火並購甲巨艦添募陸勇繕備舟師正在水盡山窮前挪者無可籌還現扣者尚須續墊此係實在情形應請俟防務稍有端倪再行分款提解下戶部知之○己亥頒給山西五臺縣五臺山菩薩頂 三寶佛 廣濟龍王廟壽陽縣北神山 軒轅皇帝祠界口村 五龍廟 炳靈公壽陽縣 關帝廟 城隍廟匾額○涂宗瀛奏洛陽偃師孟縣等處冰雹情形得 旨洛陽等縣猝被冰雹人畜田禾受傷殊堪憫惻著該撫飭令地方官認真查勘妥為撫恤毋令失所○辛丑曾國荃奏准軍機大臣字寄光緒六年三月初十日奉 上諭給事中張觀準奏山西定襄縣向有古渠約可灌田數萬畝迄今渠身久廢農民失利請飭查勘辦理等因欽此遵即委員馳往會同各地方官詳細認真履勘酌量籌辦茲據委員榮杏春會同忻州知州方戊昌定襄縣知縣鄭繼修稟稱遵即訂期會同前往渠所逐細勘得忻州忻口鎮外有滹沱河一道河流自北向南繞東而下河之東岸係蝦蟆石地方蝦蟆石之南約七十餘步有小水渠一道引滹沱河水入渠水勢自西至東經嚴嶺村即至會村寺家莊至白村外東南仍退水入滹沱河渠身綿長十餘里約寬五尺深三尺餘係嚴嶺村寺家莊白村三村公共之渠約可灌地十餘頃渠岸栽種樹木約有一千七八百株嚴嶺等三村均在渠北寺家莊白村兩村房屋廟宇墳墓均緊挨渠岸白村之東四里許有南北山溝一道土名聚兒

溝係析定交界之處溝東卽定襄縣境自蝦蟆石至黎兒溝一帶除白村等三村小渠外沿渠悉係白村等三村民人糧地並無別有渠路形跡黎兒溝東至上湯頭村一里上湯頭村至下湯頭村三里下湯頭至向陽村二里向陽村至于家莊七里沿村均係民間糧地種有禾稼並無渠形于家莊至崞縣屬之橫山八里微有渠跡當日渠路似係由于家莊中穿過現在已有房屋墳墓佔據其上橫山村至定襄縣屬之季莊十里石渠路形跡或斷或續季莊至辛安村四里辛安村至橫山鋪三里地勢甚高橫山鋪至大營村十里地勢亦高悉係民間糧地毫無渠形惟該村東頭微顯渠形約長五六丈寬一丈據定崞二縣里老指稱廣濟渠向在蝦蟆石之南引滹沱河水入渠經州境巖嶺村寺家莊白村入定襄境由上下湯頭村向陽村于家莊橫山村季莊辛安村橫山鎮直達大營村東退水仍入滹沱河相傳是渠自乾隆初年間塞迨後該二縣民人李生燁等因欲開復是渠被州民攔阻迭次控省控京委員勘明有礙田廬墳墓廟宇詳經示禁開挖查勘大營村東頭至該里老等所指退水之處地勢係山低而高難以退水以上各村亦無退水之處隨查廣濟渠舊名滹水渠乃前宋爾朱氏始開喬十萬齊全美繼之而成於州倅李子成至前明洪武年間始廢康熙二十一年復開改名廣濟渠至乾隆初年又廢載在縣志又查州志內載白村渠在州之西北引滹沱河水等語又查州卷乾隆五十八年至嘉慶初年定崞兩縣士民李生燁續

鳳來等以廣濟渠向灌一州兩縣地畝屢開復因無渠路痕跡卽指白村渠爲廣濟渠之舊址欲行開
濬經白村民人郭大逢周郭斌等攔阻涉訟互相上控先後飭委代州會同忻州勘訊並經雁平道親赴
順助各路情形委難開濬詳經前撫臣批飭出示嚴禁不准開濬道光十九年崞縣生員溫憲達復欲開
濬是渠赴京控告經步軍統領衙門咨送刑部解旨飭發定襄縣查勘經該縣稟經忻州會同崞縣督勘
而定崞兩縣民人李先選等復先後控經前撫臣飭委代州勘訊詳請照嘉慶年間斷案出示嚴禁批
飭太原府核議仍循舊案不准開濬詳經前撫臣咨部覆准有案伏查開渠引水原所以利民果是渠復
開有裨灌溉於民間無所妨礙何敢拘泥舊案不爲及時規復今細勘渠路詳閱地勢參觀舊案實於民
間先有妨礙者三不得不詳細陳查該渠之源始於蝦蟆石地方經嚴嶺村寺家莊白村入定襄縣境
乃因荒廢年久州境渠路悉成民地從前定崞二縣民人李生轉等因欲開復是渠迭次控省控京先後
委員勘明白蝦蟆石至忻定交界之黎兒溝一帶除白村渠之外悉屬白村等三村民人糧地並無別有
渠路形跡迄今又逾三十餘年之久周歷履勘更無遺跡可尋欲復是渠必在白村等三村民人糧地內
從新開挖但定崞二縣民人並無實在圖到渠基礎據又無完糧串票而白村等三村民人之地確有糧
串爲準姑無論白村等之民必不允開且蝦蟆石地方彼時歷勘地勢過於低窪闊水勢難收又兼土

性鬆浮難築渠岸現在查勘該處地勢實於前勘毫無變遷若將糧地開挖通河必致漫溢汪洋無隄以防水勢該處地畝均有淹沒之患白村等三村之民受害實非淺鮮是定寧二縣民人之利尙未見而三村之民先受其害其不可開者一也又查從前李生椿等因渠路無跡可尋欲將白村渠開寬引用餘水以灌該二縣之地迭次呈控委勘祇以該處土性較鬆渠岸不固栽種樹木以固渠岸渠旁又有房屋墳墓廟宇若准其開寬則樹株砍伐渠岸不固必致冲塌沿渠地畝房屋墳墓廟宇均有淹沒之害是以不准開寬如果此時地勢變遷能將白村之渠開寬作爲三屬民人公渠俾得均沾水利亦未始非便民之道今歷勘渠路地勢仍復如前毫無更變而渠邊房屋墳墓廟宇亦復依然佔據一經開寬均須紛紛遷移另設勢有所難且渠身既寬岸須別築該處土性較鬆不能堅固必致冲塌漫溢沿渠數十百頃地畝同遭水害該三村之民固不降心相從卽有法亦難強制其不可開者二也又查自定襄上湯頭村起至大營村東頭退水之處止逶迤四十餘里道光二十一年復勘渠路猶存十之二三今則惟橫山村至季莊一帶尙有渠路形跡其千家莊至大營村東頭僅止微可辨認其餘悉成民間糧地而于家莊又有房屋墳墓佔據舊渠之上經開濬不特挖毀糧地不少而房屋墳墓亦須拆毀遷移戶數衆多必致互相爭競且辛安村至橫山鎮地勢甚高而橫山鎮至大營村地勢亦高至州境形勢係斜長而下由州境開

渠引水乃屬逆行水性就下既不暢流而各村之北又係重山峻嶺每逢大雨時行山水河水同時暴漲悉注於此一時宣洩不及必被漫溢州屬附近渠邊低窪村莊卽遭水害況大營村東頭至退水之處地勢亦係山低而高難以退水而沿渠各村又無退水之處一經開濬又難保無泛濫之患是白村等三村之民固屬受害無窮而定襄亦受害不淺其不可開者三也總之水利爲民生所繫如果該渠之開實有益而無害縱使雨水調勻亦必世守勿替何以自前明洪武年間荒廢越二百餘年之久迨至康熙二十一年經理之後至乾隆初年又復廢棄雖其間或作或輟代遠年湮無從稽考竊恐未必非害多利少所致從前李生憐等迭次控省控京節經勘明如該渠果可復開亦何至屢請禁止開渠則是渠之斷難開復已可概見卽以現勘情形而論開復是渠不但州民受害無窮卽定興二縣民人亦無利而有害且界連三屬人民衆多此爭彼阻尤易釀成械鬪重案其害更不可勝言悉心妥議與其興利而轉有所害何如仍舊禁止免滋事端報聞○壬寅 上詣 大高殿祈晴○左宗棠奏甘肅新疆各處防營歷年承修城垣祠廟道路橋梁栽種樹株請 飭部立案從之○諭御史李振南奏條陳科場積弊亟應整頓一摺著禮部議奏另片奏嚴試交卷遲逾宜杜弊端等語著禮部一併議奏○諭譚鍾麟奏蠶書廢剝小民盡法處治並將辦理糊塗之知縣革職一摺浙江錢塘縣庫書何秉仁等平日包徵錢漕勒折浮收計贓逾

萬此次因清查荒熟輒敢將缺額田賦攤入熟地改派科則雖未徵銀入手而分給戶管勒令莊首具結致令四鄉百姓腹削不堪入城環訴現經譚鍾麟提審明確將革書何秉仁卽行正法洵足以儆奸蠹而安衆心其餘書吏卽著分別情節輕重另行懲辦以後該縣錢糧均由花戶自封投櫃不准書辦包徵從前徵收錢漕一切陋弊悉予裁革以甦民困准調石門縣知縣署錢塘縣知縣陳國香於本境荒產並未分晰查明任聽書辦朦混改派經徵錢糧書吏肆意侵吞毫無覺察昏慣糊塗至於此極僅予革職不足蔽辜著革職發往軍臺効力贖罪書吏營私執法每令良法美意阻格不行一縣如此他縣恐亦難免著譚鍾麟督飭各府州縣振刷精神勤求民隱仍將境內荒熟分數認真清理不得縱容書吏舞弊苛累小民用副朝廷實事求是至意○癸卯諭軍機大臣等現在 慈輿端佑康頤昭豫莊誠皇太后聖躬久安已逾數月體經太醫院進方調理尚未大安外省請求岐黃脈理精細者諒不乏人著該府戶部照詳細延訪如有真知其人醫理可靠者無論官紳士民卽派員伴送來京由內務府大臣率同太醫院堂官詳加察看奏明請旨其江蘇等省咨送之人卽乘坐輪船來京以期迅速○甲辰命李鴻章爲巴西議約全權大臣○諭軍機大臣等本日已另有旨派李鴻章爲全權大臣事關通商立約該大臣務當悉心籌畫按照各國約章酌議變通總期周密妥善免致將來窒礙本日簡派全權大臣諭有一道一併發往如

該使察看憑據卽著李鴻章恭錄給與閱看俟議約事畢此旨仍繳還軍機處備查○諭總理各國事務衙門奏福建船政局諸事廢弛請飭確查參辦等語據稱船政局所雇洋人藝亦平常所造之船多係舊式卽如康濟機器是其明證洋匠恐成船太速不能久食薪俸往往派華匠造器寬其限期如有先期製成者必以不中式棄之華匠相率宕延遂成鋼習管駕以至水手薪俸太厚竟有管駕數年技未必精而已坐擁厚資難免浮冒侵吞之弊等語船政局爲海防而設關係至爲緊要頻年不惜重帑創此規模宜如何實力圖維以期緩急足恃若如該衙門所問各節虛糜餉項必至貽誤要工積久相沿流弊何所底止黎兆棠市經到局無所用其迴護著卽確切查明倘有前項情弊卽分別嚴行參辦併將船政局刻意講求認真整頓應如何實事求是之處卽由黎兆棠奏明辦理○諭御史邵曰瀛奏直隸停止分發請飭部查明人數酌定年限等語著該部議奏○諭文秀奏右翼關稅期滿止額無虧盈餘未能足額一摺著戶部核議具奏另片奏追罰房間漏稅銀兩等語著戶部照例辦理○諭烏拉喜崇阿奏左翼關稅期滿正額無虧盈餘未能足額一摺著戶部核議具奏另片奏員外郎營伍漏未稅契已照章交納正稅並非有心隱漏等語著全著免交罰項並免其議處○周恆祺奏衡水發於河南衛輝縣之百門泉源本弱上流僅能行百餘石小船迨入山東館陶與清漳澗漳合流而水勢始大至此方得重載行駛今議導以

二
濟運萬無由臨清倒灌之理自應如漕臣文彬所議由石堦北起挑挖引河經直境南樂東境朝城陽穀
壽張至張秋蕭公涵洞以入於運惟查石堦在館陶以上衛水未曾合漳分其一縷之流何能曲折濳洞
於百數十里之遙卽謂時逢夏令衛水正當漲發不知盛漲之水消耗亦速更難必其與黃流同時並漲
且御史葉蔭昉原奏謂黃流漲落只在須臾夫以黃河之浩瀚奔騰漲落尙不可必而謂清淺之衛可保
一兩月間有漲無落不待智者而自明恐水勢之不足恃也又查現擬開挖引河自西至東一百五十餘
里其間地勢大都平順惟衛河沿至南樂一段高下不等陽穀境內蘆裏村至果子倉一段較高數尺至
一丈餘不等引河挑深一丈係就平坦之處而言地勢高至一丈以上卽須挑深至二丈數尺矣臣因
撙節經費議將河道土方減去三分之一只期引水不必行船惟查原估河口本不甚寬今減三分之一
則岸陡河窄可知竊恐風雨淋刷車馬往來兩岸沙土鬆浮不久卽行塌卸恐地勢之不足恃也又查原
估工程共需銀七十六萬餘兩漕臣覆估各工共需銀七十五萬餘兩東省庫藏無多不敷周轉本年以
辦理海防添撥的餉十七萬兩近又遵 旨訂購蚊船二隻需銀三十萬兩苦思力索正在無可搜羅更
何能於竭蹶不遑之時籌此大宗用項若待鄰封協撥而各省支絀相同亦恐未能應手此經費之不易
籌措也又查葉蔭昉原奏所稱與其用黃水之濶何如用衛水之清臣此次查勘河道沿途諮訪敢謂衛

河平時水淺則清至盛漲時亦屬渾濁以之濟運恐與借黃無異且新開河引既不寬深水緩沙停淤墊必易將來年年挑挖勞費無已此工程之未必能一勞永逸也且臣等更有慮者上年江北漕十萬石用船五百餘隻渡黃河入運半月方畢全漕總額三百餘萬即逐漸規復以現在江浙百餘萬石計之亦須用船五六千號非二三月不能悉數進口衛水固盛漲時斷不能持至數月之久設使漕米過半而水已消落數千重艘阻聚河干其患何堪設想臣等竊謂欲擬導衛濟運如能使衛水全出於新開之河從張秋以至東昌臨清而又加以坡水或可有濟然蘆鹽陳糧均有阻礙近河民田恐失灌漑之利事爲直隸二省大局所關自須咨商欽同方敢定議且新開之河亦必照原估丈尺加展數倍方能通暢所用經費至省亦須一二百萬兩此又工煩費鉅而非一時所能遽辦者也臣等往返兩商此時惟有欽遵 諭旨將運道設法疏通而收蓄坡水挑挖運河洶爲目前疏通之要漕臣文彬奏請擇水深之處各設一塘將民田積水引入塘內一節查運河東西兩岸積水之處尙多如遇雨水調勻積水在所必有上年黃汛不大漕船入北運口後頗資坡水匯注之力現擬查照漕臣所議於運河附近略仿水櫃做法擇低窪之區開濬塘河遇春夏大雨時將民田積水隨處導引入塘以備濟運之用且免漫淹之患臣現委知府戴杰前往查勘先就西岸陽穀聊城一帶相機利導俟試辦有成再行推廣其應如何開河築堤並候 洞以

資漸淺及估需銀兩若干另行妥議具奏又漕臣文彬奏請將北運河之臨清一帶擇要挑挖修治一節查黃水穿運以來受淤已久各州縣雖有歲修皆未能挑挖到底上年派委道員吳秉儒督同按段加挑漕行較爲迅速本年又復先期委員實力挑挖惟兩岸沙土成堆漕船過後仍不無積淤之患擬俟庫款稍舒籌撥銀兩揀派結實辦事之員督同地方州縣普加疏濬務期深挑見底並將各閘座一律修整以冀漸復舊制總之治河卽以治漕近年挑運之艱不僅在北路運河南運河失治有年堤缺河淤比歲僅能擇要修築黃河穿運之處漲落靡常須俟伏汛盛漲漕船方能挽渡迨入北運口門後縱有淤淺尙可勉強人力今欲爲規復河運之計卽令北運河之水足資浮送而南運河未能暢通渡黃未能利速於全局仍多窒礙得旨導衛濟運既多窒礙卽著照所籌辦理毋庸再行核議該部知道○丙午以杜嘜爾爲烏里雅蘇臺將軍喜昌爲烏里雅蘇臺參贊大臣○命興廉查勘裕陵純惠皇貴妃園寢西配殿等處工程○丁未賞福錕副都統銜爲西甯辦事大臣○曾國荃奏欽奉諭旨飭將戶部籌備餉需各條趕緊妥籌定議限兩月內據實覆奏等因欽此除兩庫折價停止工程二條應由戶部分別核辦捐收兩淮票本一條應由兩淮鹽政運司詳議外如嚴催墾荒一條查督省頻年大祿省南各郡人民已少里社之內龜突無烟自去夏至今仰託聖主威福風雨調和歲事漸轉流亡漸復卽經設法招徠廣籌

牛具籽種分散民間牛籽不繼改議酌給銀兩災重之區每畝給銀五錢其次三四錢不等貧農耕辦有資汗萊漸闢現據各屬稟報荒廢田畝不及十之二三歷經奏懇 恩施分別蠲免停徵以蘇民命閩閩歌頌 恩德歡呼載道異鄉聞風歸耕者絡繹而來三五年後應有起色或不至糧額久缺如通核關稅一條查管省關稅除殺虎口山 欽派監督經理外惟歸化城一處向委歸綏道經收自各口通商洋貨茶稅均形減色近因旱災頻仍關稅尤形短絀足額已屬為難實無溢之款可作羨餘之供如整頓釐金一條查管省僻處山陬迴非東南水陸通衢商賈輻輳可比向設總散各卡二十五處豐年所收不過十萬上下災後商販尤少更成勢寒而司庫支絀萬狀勢難裁撤惟有嚴定賞罰比較分數庶可以杜中飽如嚴查交代一條查管省交代向來清算尚易軍興以後州縣挪欸墊支兵差各項攤捐逐日增加遂至欸項輾轉前已節次明定章程設局督算如欸項未清實缺調署人員不准赴任候補人員不准委署各該員尙知奮勉均能陸續措交嗣後倘有久懸不結者仍當照例參辦以重庫欸如嚴催奏銷一條查管省錢糧奏銷向係按照定限趕緊造辦或有因公不能依限辦理者亦均據實奏請展緩不敢無故逾限倘經收各官有因規避處分託故遷延者自當照例參處斷不稍涉瞻徇如催提減成減平一條查管省通年所入錢糧稅釐不過三百餘萬兩自軍興以來歲撥京餉及各處協餉本省軍餉約銀五百餘

萬兩不敷在二百萬兩以外歷經奏明有案每當司庫窘迫萬分之時不得不移緩就急是以數十年來徒有減成減平之名並無實存在庫之欸比歲錢糧蠲免捐協告停來源已竭支絀日甚實屬無力搭解積年欠欸往後能否籌解此項亦難懸揣倘蒙減除協餉司庫可資周轉或可設法完解以上七條均屬管省實在情形並無一言虛飾至各就地方籌欸興利一節查管省物產以鐵爲大宗近因荒歲歇業者多曾經籌銀數萬兩發給潞安鐵商以作資本令其營運現已逐漸開爐近聞絳縣頗產紫銅業經委員查勘如果銅苗暢旺擬即開礦鑄錢他如興水利以備旱潦俾農田可資灌溉開車路以通商賈俾百貨可以流行雖皆委員試辦將來能否有效尙無把握是以不敢率爾上陳下戶部知之○己酉吳元炳等奏淮之一瀆胎替山發源匯四十餘河之水而瀦之洪澤湖其揚莊以下雲梯關係淮水入海故道去路既暢乃引餘波入運濟漕遇旱復瀦蓄淮流由運河分入淮揚各閘洞以溉民田洪澤一湖勢如傾盆不能瀦水張福口引河不能通暢致洪澤湖之水山三河壩缺口直注高寶湖不能容納遂於運河堤殘缺處溢入運河每遇盛漲湖與運河連爲一片加以東省蒙沂山水由中河入順清河會注運河江水消落尙可宣洩歸江設遇江湖頂托運河所受太多一綫東堤岌岌可危倘或漫溢不至以裏下河爲壑不止光緒四年伏汛極盛裏下河勢甚危險經臣文彬將飭道廳各員駐工搶險竭力隄防幸告無事數百萬

生靈所繫思之深爲寒心論者謂必設法束之庶免旱則易涸潦則易漲之患但上游議堵非下游與引河深通使長淮及泗沂諸水得循故道入海則堵之適所以害之何則就下者水之性也不順其性但強挽之使不得逞洪流湍悍愈遏愈怒潰決之患作矣前督臣沈葆楨自費苦心修築東西運堤卽定議續挑揚莊以下舊黃河非不慮辦費之巨也誠以運堤爲裏下河保障而所以保運堤者更不容不併力圖之惟洪澤湖淤墊之處甚者幾同平陸揚莊以下舊黃河淤墊更甚地段綿長工費艱鉅非籌有巨資難議疏通非寬以時日不能成工事關淮揚全局如偷目前之安恐貽後日之患現署徐州道江蘇候補道張富年江蘇候補道程國熙皆河工老手現署淮揚海道桂嵩慶熟悉工程一俟東西堤完工當令其接續勘估籌議勻年興辦所謂七年之病求三年之艾苟不畏難自阻當司有志竟成等已札委熟悉清淮一帶情形之員先往周歷復勘應如何將洪澤湖張福口引河等處及揚莊以下舊黃河參酌情形擇利而從分別疏濬蓋挑揚莊以下舊黃河兼可分洩蒙沂山水歸海使衆河多一去路運河卽少一來源實爲入手要著所需經費俟委員查勘復到再行會商妥辦總期工歸實濟欸不虛糜爲一勞永逸之計報聞○庚戌諭涂宗瀛奏勘明河南洛陽等縣被雹情形分別撫卹請緩徵錢糧等語本年四月間洛陽等縣均被冰雹損傷麥禾業經分別撫卹一律補種惟念該處大祲之後元氣未復茲又據稱被雹情形



更爲困苦若將應完錢糧照常徵收民力實有未逮所有洛陽縣屬之寺裏碑等二十五村莊偃師縣屬之石橋鎮等三十九村莊孟津縣屬之東關等十九村莊孟縣所屬之璩溝等三十村莊濟源縣屬之趙順莊等五十八村莊本年應完錢糧著緩至秋後由該撫察看情形奏明辦理用示體卹民艱至意○漕運總督文彬奏贈太子少保銜予祭葬○以黎培敬爲漕運總督○李鴻章奏直隸南運河上承山東河南山西汶衛漳諸大川之水其流甚巨汛漲每虞漫溢是以從前於東境四女寺咽喉馬營直境捷地興濟等處共開減河四道以資分洩道咸年間減河皆就淤廢迄未重開於是全河之水悉注天津三岔口一隅上游數百里隄防旣甚危險下口更不能容洩蓋三岔口係永定大清滹沱南運北運五大河總匯之路僅恃一綫海河曲折趨赴大沽入海實有擁擠不下之勢雖前於三岔口以北陳家溝添挖減河別通北塘入海但與南運河無涉若欲挑浚捷地興濟萬有減河其下游久已淤成平陸工大費鉅無此財力只可另行擇地酌辦上年秋冬臣飭統領盛軍天津鎮總兵周盛傳天津道吳毓蘭候補道史克寬往返相度查得津城東南相近海口地面業經盛軍自開直河一道以爲軍民營田灌溉之用上自興農鎮下至西大沽出海計長九十里並有橫河六道各長數里旁流分洩而入海河尾閘又有無數溝渠左右縈帶大可因勢利導爰議自上游靜海之靳官屯南運河東岸起至興農鎮六十餘里開成一河卽可直接

該軍營田之河分洩南運盛漲入海免致全注天津三岔口壅遏爲患查勘地勢既順下口亦暢其間大半城地並無壓墓且下游已有九十里現成之河可則事半功倍遂酌定開挖口寬十丈至十二丈底寬四丈五尺至七八丈深八尺至一丈二三尺挖出之土於兩岸十丈外各堆成堤庶堤內共有三十餘丈容水之地其靳官屯河頭建石壘雙料五孔橋閘一座以資攔阻沿河分建石鐵柱板橋四道以便行人惟庫款極絀勢難全雇民夫辦理不得不借資兵力當飭抽調盛軍步隊十一營銘軍步隊十營百北口保定大名正定河間等處練軍步隊十三營共合三十四營卽責以挑河堆堤事宜於今年二月初齊抵工次分認段落興辦每營酌給鐵籠器具等銀一千兩先期派員劃清界址丈量堤河所佔民地分等核擬價值豁除糧租一面購料集夫建造閘庫橋道以工代賑正值春冰甫泮積水盈途且地近海灘掘下二三尺又復出水工程甚形棘手在事員弁不辭艱苦親率兵夫設法挑溝厚水節節搶辦胼手胝足悉力經營卽於四月二十日全河挑挖完竣兩岸堆築成堤並於堤外另挑溝道以瀉附近瀝水而免漫淹民田臣於四月二十七日親往周歷查驗丈尺均過原估河身通暢橋閘因上洩南運盛漲之水注盛軍營田之河於水利農田實有裨益而津城迤西至東阡陌縱橫河渠複繞將來啟壩放水其尾閘應否再建攔潮閘座或沿河尙應添建橋道隨後查看酌辦仍飭該鎮道等妥籌修守章程督同地方文武隨

時認真經理以垂久遠各營兵勇勞苦出力已酌給賞犒分別留防撤回所需欵篋器具地價犒稿及橋
開工費統於賑撫項下勻撥循照歷次成案彙開清單奏報報聞○以游百川爲四川按察使○辛亥會
紀澤奏伊犁一案大端有三曰分界曰通商曰償款籌辦之法亦有三曰戰曰守曰和言戰者謂左宗棠
金順劉錦棠諸臣擁重兵於邊境席全勝之勢不難一鼓而取伊犁似也臣竊以爲伊犁地形巖險攻難
而守易主逆而客勞俄人之堅甲利兵非西陲之回部亂民所可同日而語大兵履險地以犯強鄰直可
謂之孤注一擲不敢謂爲能操必勝之樞也不特此也伊犁本中國之地中國以兵力收回舊疆於俄未
有所損而兵戎一啟後患方長是伊犁雖倖而克復祇可爲戰事之權輿而不得謂大功之已就也俄人
恃其詐力與泰西各國爭爲雄長水師之利推廣至於東方是其意不過欲藉伊犁以啟釁端而所以擾
我者固在東而不在西在海而不在陸我中原大難初平瘡痍未復海防甫經創設布置尙未悉周將來
之成效或有可觀第就目下言之臣以爲折衝禦侮之方實未能遽有把握又況東三省爲我根本重地
迤北一帶處處與俄毗連似有鞭長莫及之勢一旦有急尤屬防不勝防或者謂俄多內亂其君臣不暇
與我爲難臣則以爲俄之內亂實緣地瘠民貧無業亡命者衆也俄之君臣常憂邊陲有事藉侵伐之役
以消納思亂之民此該國以亂靖亂之術而西洋各國之所稔知凡與之接壤者因是而防之益嚴疑

之益深顧未聞有幸其災而樂其禍者職是故耳又或者謂連結歐洲各邦足以怵俄人而奪其氣是固欲以戰國之陳言復見諸今日之行事不知今日泰西各國之君非猶是戰國時之君各國之政非猶是戰國時之政也各邦雖不盡民主而政則皆於議院主持軍旅大事尤必衆心齊一始克有成今日之使臣雖得辯如蘇張智如隨陸亦不能徧赴各國議院之人而說之卽令激之以可怒動之以可欲一旦奮興慨然相助試思事定之後又將何以厭其求疆者俄土之役英人助土以拒俄大會柏靈義聲昭著卒之以義始者實以利終俄兵未出境而賽卜勒士一島已入英人國籍矣況各邦雖外和內忌各不相能而於中華則獨有協以謀我之勢何也一邦獲利各國均沾彼方逐逐耽耽環而相伺之不暇豈肯顯違公法出一旅以相助是戰之一說刻下固未易言也言守者則謂伊犁邊境一隅之地耳多予金錢多予商利以獲之是得邊地而潰腹心不如棄之亦足守我所固有伏維我朝自開國以來所以經營西域者至矣康熙雍正之間運餉屯兵且戰且守邊民不得安處中原不勝勞敝而我聖祖世宗不憚勤天下之力以征討之良以西域未平百姓終不得休息耳迨至乾隆二十二年伊犁底定西陲從此安枕腹地亦得以息肩是伊犁一隅夫固中國之輿區非僅西域之門戶也第就西域而論英法人謂伊犁全境爲中國鎮守新疆一大礮臺細察形勢良非虛語今欲舉伊犁而棄之如新疆何更如大局何而說者

又謂姑紓吾力以俟後圖然則左宗棠等軍將召之使還乎抑任其逍遙境上乎召之使回而經界未明邊疆難保無事設有緩急不惟倉卒無以應變卽招集亦且維艱任其久留則轉餉浩繁不可以持久也夫使歲費不資而終歸有用猶之可也若竭天下之力以注重西陲歷時既久相持之勢漸有變遷與兵者非復舊人將帥之齟齬不同兵卒之勤懈不一誠恐虛糜餉糈仍歸無用而海防之規模亦因之不能逐漸開展則貽誤實大此固廷臣疆臣所宜及今妥籌全局不可視為日後之事而忽之者也我 皇太后 皇上憫念遺黎不忍令其復遭荼毒遣派微臣思有以保全二百年來之和局則微臣今日之辯論仍不外分界通商價款三大端三端之中價款固其小焉者也卽就分界通商言之則通商一端亦似較分界爲稍輕查西洋定約之例有二一則常守不渝一可隨時修改常守不渝者分界是也分界不能兩全此有所益則彼有所損是以定約之際其慎其難隨時修改者通商是也通商之損益不可逆睹或開辦乃見端倪或久辦乃分利弊或兩有所益或互有損益或偏有所損或兩有所損是以定約之時必商定若干年修改一次所以保其利而去其弊也中國自與西洋立約以來每值修約之年該公使等必多方要挾一似數年修改之說專爲彼族留不盡之途而於中華毫無利益者其實彼所施於我者我固可還而施之於彼誠能深通商務之利弊酌量公法之平順則條約之不習正賴此修改之文得以挽回於

異日夫固非彼族所得專其利也俄約經崇厚議定中國誠爲顯受虧損然必欲一時全數更張則雖施之西洋至小極弱之國猶恐難於就我範圍俄人桀驁狙詐無端而且生風今於已定之約忽云翻異而不別予一途以爲轉圜之路中國人設身處地似亦難降心以相從也臣之愚以爲分界既屬永定之局自宜持以定力百折不回至於通商各條惟當卽其太甚者酌加更易餘者似宜從權應允而採用李鴻章立法用人之說以補救之如更有不善則俟諸異日之修改得失雖暫未公平彼此宜互相遷就庶和局終可保全不遽決裂然猶須從容辯論虛與委蛇非一朝一夕所能定議也俄約之准駁應經廷臣分別奏明而臣未至彼都已先進通融之說未免跡涉畏愆以致物議沸騰顧臣竊思之求一定之規模但責臣以傳達兩國之語言聽列應駁之條屢辯而力爭之事之成敗非所敢知是臣之責任較輕於臣之私計伏念微臣世受國恩濫躋卿貳卽使身在事外苟有一知半解猶宜盡獻籌筴以備聖明採擇況既膺使職責任攸歸豈敢緘默唯阿函恭從事自避嫌疑之謗上貽宵旰之憂臣所總總過慮者竊恐廷臣所議除償款以外所有通商分界各條逐條均須駁改在議者所持出屬蕩蕩平平之道堂堂正正之辭也然再經而不言極論理而不論勢俄人之必不見允則不待智者而後知之如此則日後之事不外三途一曰俄人不允則納干比戈聲罪致討此戰之說也廟堂自有勝算非使臣之所敢議也一

曰俄人不允則暫棄伊犁存而不論此守之說也是邊界不可稍讓而全境轉可盡讓也臣亦未敢以爲是也一曰俄人不允然後取現今之所駁者陸續酌允委曲求全此和之說也然則目前之所駁是姑就吾華之公論聊以嘗試之耳嘗試不效乃復許之此市井售物探價之術非聖朝所以敦信義以馭遠人之道也俄人本以夸詐爲能事若此時遂條駁改日後又不得已而允之則將益啟其狡譎之謀且使西洋各國從而生心誠恐此次伊犁約章所挽回者無幾而從此中外交涉之務議論日以滋多也所以言分界之局宜以百折不回之力爭之通商各條則宜從權應允者蓋以准駁兩端均貴有一定不移之計勿致日後爲事勢所迫復有先駁後准之條此臣愚昧之見也事體如此重大本非一人之見所能周知請旨飭下總理衙門王大臣及大學士六部九卿原議諸臣詳細酌覈臣行抵俄都但言中俄兩國和好多年無論有無伊犁之案均應遣使通誠此次奉旨前來以爲真心和好之據至辯論公事傳達語詞本係公使職分容俟接奉本國文牒再行秉公商議云云如此立言則入境或不致遂見拒絕至於約章如何辯論計原議諸臣此時必業經奏明准駁知照前來惟軍國大政所關實非淺鮮似不厭再三詳審精益求精當俟廷臣細行商定之後由總理衙門暫行到臣始敢與該國平情爭論若臣言力爭分界酌允通商之說稍有可採則在廷諸臣自必考究詳斟酌盡善乃定准駁之條即臣說全無是處

通商各條必須全駁。俟接准總理衙門文牘自當恪照指駁之條逐一爭辯。臣自惟驚下勉效馳驅。際此艱難益形竭蹶。惟有懷遵不激不隨之聖訓。殫竭忱冀。收得尺得寸之微功。稍維大局。又奏。臣於光緒六年四月十七日接准總理各國事務衙門密致電報云。到俄先告以難准之故。如因條約不准。不還伊犁。大可允緩。能將崇讓兩作罷論。便可暫作了局。意在歸宿到此。惟勿先露。因約通商分界。俟後商辦亦可告知。初五日有寄諭先電聞等因。臣等電請緩索伊犁。係最後一著。須說明是暫緩。非徑讓。此亦西例也。等因。去訖。竊思俄人趁我之索還伊犁。恣意挾案之愈急。則挾之愈多。暫置不論。自係權衡利害之輕重。而明絕其覬覦之心。查西洋各國每有因辯論之事。兩國爭持不能平允。而又不欲輕於用兵。於是知照該國。且布告各與國。謂某事本國未經應允。特以不欲用兵。姑從緩議。英人名此法曰「噤嘴」。太司特無論強橫無禮之國。見有「噤嘴」。太司特文照。即應將所議之事。作為暫緩之局。暫緩者。少則數月。多則數年。數十年。并無期限。遇有機會。仍可將前事提出商論。此固西人辦理交涉事件之通例。而中國於伊犁琉球等案。皆可仿而行之者也。臣摺中以伊犁邊界不可稍讓。全境轉可盡讓。為疑如用「噤嘴」。太司特辦法。自可免棄地之嫌。惟是伊犁一域。實我要區。暫置不論。終是未了之案。況舊約亦有通商分界諸事。虛懸未定。是暫置伊犁而爭論。仍不能遽息者。在我本有萬難遲息之勢也。臣愚以為緩索伊犁。姑

廢崇厚所訂之約總理衙門所謂意在歸宿到此者自係專指目前局勢而言至於將來之歸宿似仍宜辦到通商稍予推廣伊犁全境歸還乃可眞爲了結臣未赴俄都并非受俄人之挾制而妄進通融之說徒以揆度敵情熟極事勢稍有所見不敢不言請 旨飭下原議諸臣妥議具 奏臣到俄之後即當恪遵 奏定准駁之條確確固執不敢輕有所陳不敢擅有所許雪咽旌期於不屈而後已 上諭軍機大臣等會紀澤奏籌辦伊犁事宜各摺片前諭該少卿以伊犁一事如無成議祇可兩作罷論原是暫時歸宿茲據奏稱分界宜以力爭通商似可酌允等語伊犁係中國土地從前俄人祇稱代收代守是尙不敢公然居侵佔之名中國向其索還舊贖本係名正言順至通商一事自當極其利害輕重予以限制其必不可行者亦未可遽就從事致貽後患前經王大臣等將約章等件酌駁可行不可行奏准咨行照辦此時計已接到該少卿當就原議各節妥慎辦理如有應行最爲變通之處仍當隨時察看情形奏明請旨該少卿將所陳管見飭廷臣議奏之處著毋庸議將此密諭知之○壬子諭巡視東城御史桂年等奏遵保拿獲鄰境盜犯出力之司坊官懇請獎勵一摺著吏部議奏○癸丑諭通政使司參議胡家玉奏河南各州縣漕米請飭改徵本色起運交倉一摺著戶部議奏○乙卯諭寶鋆等奏 穆宗毅皇帝實錄聖訓尊藏事宜請旨辦理一摺 穆宗毅皇帝實錄 聖訓尊藏皇史宬本及內閣副本所有一切應

行典禮事宜著該衙門議奏至尊藏盛京本與玉牒一併恭送一切應行預備之處著該衙門查照上
屆成案敬謹預備○萬壽綦因病請開兼管順天府府尹差使允之○內辰追子烏魯木齊都統英翰於
安徽建祠○何璟等奏福州省城連雨江漲情形得旨覽奏殊深慮系該督等務將賑撫拯救事宜認
眞籌備其被水遷徙人口並著飭屬妥為撫恤毋任失所○戊午銘安等奏青省旗民各戶向係伐木炊
爨溯自嘉慶二十一年經將軍富俊奏准開採荒山子等處煤窖三座收納稅課歷辦有年嗣於同治七
年將軍富明阿續請試開火石嶺子等處煤窖八座當奉戶部議覆以吉林地方伏莽未淨增設煤窖開
採之始必多集丁夫其中良莠不齊難以稽察且圍場禁山地脈相通恐於風水有礙奏請一併封閉奴
才等竊以為政在養民不外就地興利事關籌餉尤貴因時制宜近來青省生齒日繁人烟稠密山木愈
伐愈遠挽運非易價值日昂居民日用必需多受柴薪之累若不開採煤斤以資民用則數十年後柴薪
愈見稀少炊爨艱難本省僅有煤窖三座所產無多不足供通省之用奴才前奉 寄諭經費一層該省
如有可籌之處亦應實力籌辦等因欽此卽以試開煤窖利益民生抽收稅課曾經附奏在案正在體察
籌辦間於五月初一日准工部咨開監生尙崇琦等呈稱查青省釐子溝等處盡屬荒山煤苗透露堪以
開採且均距省窺遠無礙風水情願自備工本雇覓本地居民前往開作等語本部未便據呈率准相應

知照迅即委員按照呈稱各處詳細查勘等因咨行前來復據本省民人董琦等先後具呈亦以試開煤
審照章納課爲請伏思煤審之開下便民生上充 國課利益實屬無窮前任將軍均已籌議及此而戶
部以地方未靖誠恐奸宄潛蹤藉端滋事奏請封閉所慮不爲不周第近來剿辦馬賊大股現已肅清金
廠渠魁以次剿滅而五方流民謀食遠來勢難盡行驅散若使無慮謀生誠恐相聚爲盜倘試開煤審則
無業窮黎皆得趁工餬口自可化莠爲良於地方似有裨益查吉省煤審捐納舊章每座僅收稅銀十七
兩六錢另八釐現值庫款支絀之時百貨均有釐捐煤斤自應照辦擬請毋庸交納舊定稅課仿照現辦
資釐章程其實中錢一千抽收一十文所取無多該商斷無不樂從之理如果煤苗暢旺自必稅課豐盈
不但火食有賴柴價自平商民同需樂利而抽收稅課亦可稍濟餉需得 旨著照該將軍等所請試行
開採惟當認真經理毋任滋生事端一切詳細章程卽著妥議具奏○命文煜邵亨豫承修 裕陵 純
惠皇貴妃園寢西配殿工程○庚申以董華兼管順天府尹事務○命戶部尙書董恂毋庸在總理各
國事務衙門行走○召曾國荃入覲以葆亨護理山西巡撫○岐元等奏昌圖府屬擬請添設知縣並佐
雜各官以資分治查光緒元年前署將軍崇實因昌圖府地廣民頑奏請試辦河斗兩稅以爲設官經費
擬將昌圖同知改升知府於梨樹城增設通判八家鎮增設知縣庫家屯增設知州各一員嗣於光緒三

年奏明將昌圖同知除升知府並先後於八家鎮增設懷德縣梨樹城增設泰化縣當以康家屯尙屬近邊且河稅未行開辦經費不足將八家鎮經歷移駐康家屯作為分防府經歷均奏蒙 恩准由部核覆遵辦在案茲據昌圖府知府趙受璽詳稱查康家屯離府雖近惟西北一帶地面生齒日繁流民耕種殆遍雖不若懷德泰化兩縣沿邊緊要而地方遼闊詞訟命盜案件層見迭出由府自理勢難兼顧且蒙民雜處撫輯尤關緊要分防經歷職小樞微難以整頓必得以正印之員鎮壓其間方可從容就理擬請將康家屯經歷一缺裁撤照八家鎮梨樹城章程添設知縣一缺名曰康平縣府屬遼河以西之地分歸管轄照章加理事同知銜以便蒙民兼理所有徒罪以上命盜各案由府審轉以昭慎重並設典史一員照懷泰兩縣章程加六品銜尋司監獄康家屯迤北鄭家屯地方界連蒙古封堆民情强悍擬設分防主簿一員照八面城照磨章程加六品銜分司緝捕暨勘驗命盜各案戶婚田土細故准其就近審理徒罪以上之案送縣核辦該縣應管界地周圍四百餘里地面既闊緝捕緊要現派外委一員捕盜兵三十名在彼駐紮實屬不敷彈壓擬請添練捕盜馬兵二十名添派把總一員管帶再行撥給舊額捕盜兵十名共有弁兵六十二員名分扎緝捕庶於地方可期整頓至添官增兵一切經費現在昌圖斗稅除開支一府兩縣用項外每年尙可餘銀二千餘兩試辦同江子稅雖無定數每年約可收銀二千兩上下以此支

放已屬有餘將來修建衙署監獄卽由支存餘款陸續動撥另案報銷至學校一事現查該處應試人少擬請暫附府學考試以後察看應試人多再行詳請奏設訓導學額以符定制等情詳請具 奏前來奴才等覆查昌圖府屬之康家屯地面本屬遼闊原擬設一知州前因經費不敷未能與懷德泰化兩縣同時並立今該府既辦有經費請照八家鎮梨樹城章程添設知縣分防等官仍以該處所出卽供該處所需無庸另籌款項洵爲整頓地方要務懇 恩准於康家屯等處添設知縣各官以資分治所有清界址定缺分照支廉俸酌添弁兵各章程謹繪圖貼說臚列清單恭呈 御覽相應請 旨飭部核議施行並頒發正佐印信以昭信守其餘未盡事宜應由奴才等隨時詳議請 旨定奪得 旨該部議奏軍機處○癸亥諭北洋防務極關緊要需餉尤殷各省關應解經費著嚴飭趕緊撥解大批濟急庶金必解足八成關稅必照章提前解再延欠卽著李鴻章嚴參照延誤京餉例議處○甲子 上詣 大高殿 壽皇殿行禮○丙寅予故提督徐承燾附祀英韓專祠